

MARK

Kəsəkəs ka Kibaru Kətət teta Yesu nkε Mark encicəs mə

Kibaru Kətət ka Mark buk bin ba Kadəm Kəfu bə bəyənə səbuk nse maŋkələ daco nse səloku tecepərəne doru ta Yesu Krist mə. Buk mbε o mbε səbuk saŋse maŋkələ daco, «Taruku ta Kibaru Kətət» t'aŋwe bi. Matiye, Mark, Luk kə Isan ɲanacicəs səbuk saŋse defi da Yesu Krist tadarəŋ. Ancem-cemne a taruku tantε tə ananunkenε kəcicəs meren wəco camət-tin (60) kəbər ka meren wəco camət-mərən (70) ntε kəkom ka Yesu Krist kəncepər mə. Acərə taruku alarəm ɲancem-cemne a dare da Rom anacic buk bambε, teta kəyenkəs bəkəc ya alan a Yesu aka Rom. Mark, nwe anacərə sɔ tewe ta «Isan Mark» mə, wanapa ka asom a Yesu Pol kə Barnabas enayi. Mba kəpε kən tewe kənacop ntε enasak kəkət marənt teta kəsamsər tosom ta Yesu mə (Asom 13.13). Ntε tencepər mə, Mark enader pəkət marənt kə Barnabas (Asom 15.37-39). Anacərə Mark kəyənε ka wanapa wətət ka Piyer (1 Piyer 5.13). Ali ntε kəyi doru ka Yesu kənatəcepər fər ya Mark kirin mə, acərə taruku ɲancem-cemne a Mark enamenkərne moloku ma sede sa Piyer mme məyənε mogbu ma Taruku ta Mark mə. DəKibaru Kətət kaŋkə disrε, Mark oloku teta acεpsε a Yesu darəŋ kə mətəkse ma Yesu teta tēm telpəs ta doru.

Tokotərəne ta Taruku ta Kibaru Kətət ka Mark

1. Mark ementər buk (1.1-13)
2. Mark oloku təkətene mes ma Yesu ntε enayi

- Kalile mō (1.14-8.21).
3. Kō tēyefē dānda, k'oloku kākō marənt ka Yesu Yerusalēm (8.22-10.52).
4. Dākələpsər, kō Mark encicəs tecepərənē doru ta Yesu Krist nde Yerusalēm kələkənē defi kō kəfōtē kən afi daco (11.1-16.8).

Taruku ta Aṇnabi Saṇ Batis

¹ Dəkəcop da Kibaru Kētōt teta Yesu Krist* Wan ka Kanu dō dandē.

² Deyi pāmō ntē ancic ti nde buk ba sayibē Esayi disrē mō:

«Indekekərē wəsom kem fər yam kirin
pəkəlomps'am dōpō.

³ Fum wəkō dim dən deyī kəwūr nde dətēgbərə mō
ōfō:

«Nələmpəs dōpō da Mariki,
nələmpē səpō sən sa wēcək!»

⁴ Itō Aṇnabi Saṇ Batis ɛnaderenē nde dətēgbərə, pəkəwandi a pagbət afum dərōmun teta kəsəkpər bəkəc ṇacəmə pələmpu darəṇ, ntē tənṣəṇjē Kanu kədenaṇnənē ṇa kiciya kəṇan mō.

⁵ Afum aka atōf ṇa Yude kō aka Yerusalēm fəp ṇanckō nde eyi mō, ṇacsətər kō kəgbət dərōmun teta Kanu, nde kəṇgbəkō ka Yurdən ṇaccəṇ kiciya kəṇan afum daco.

⁶ Yamos ya cəfon ca yəkəmə yō Saṇ ɛncbərənē, pəcgbəncnē bēlet ba akata defi. Cəlaṇkəma c'əncsəm kō mēsē ma cəmə ca dəkulum.

* **1:1** Krist = Tewe ta dəkəcəmə da nwe Kanu kəyek-yək kəyōnē ka wəyac ka afum a doru mō. **1:2** Malaki 3.1 **1:3** Esayi 40.3

⁷ Pácdánjk: «Fum eyi káder im tadarəŋ, nwɛ ɔyɔ fənəntər pətəs im mə, isətɔ fɛ dofum dotulnɛnɛ isikəli cɔfta cən.

⁸ Ina, dərómún ɪŋgbət nu teta Kanu, mba nkən dəAmerá Nɛcɛmpɪ ɲa Kanu ende pəcgbət nu.»

⁹ Mata maməkɔ kɔ Yesu ender kəyɛfɛ Nasarɛt dare da Kalile, k'əsətər Saŋ kəgbət dərómún teta Kanu nde kəŋgbəkɔ ka Yurdɛn.

¹⁰ Yesu endepɛ dərómún, gbəncana babəkɔ k'ɛnəŋk kəm kəŋgbɛrɛ, k'ɛnəŋk sɔ Amera ɲa Kanu ɲotorər kɔ pəmɔ antantoriya.

¹¹ Kɔ dim dontor kəyɛfɛ dəkəm: «Wan kem məyɔnɛ nwɛ imbətər mə, mən'ɔbət im mes belbel.»

¹² Gbəncana babəkɔ kɔ Amera ɲa Kanu ɲɛŋjekərɛ Yesu nde dətɛgbərɛ.

¹³ K'encepərənɛ di mata wəco maŋkələ (40), Sɛntani səcwakəs kəsɔŋ kɔ kəciya. Sɛm ya dəkulum yɔ ɲanayi, mɛlɛkɛ mɛckɛkəs kɔ.

Acɛpsɛ darəŋ a Yesu acəkɔ-cəkɔ aŋɛ maŋkələ

¹⁴ Ntɛ analip kəsɔŋ Saŋ kəbɛr dəbili mə, kɔ Yesu ender Kalile, pəcdánjk Kibaru Kátót ka Kanu,

¹⁵ pəcloku: «Tɛm tɛmbəp kɔ dəbɛ da Kanu dɔlɔtərɛ. Nəsəkpər bəkəc nəlomp, nəgbəkər kələn Kibaru Kátót ka Kanu!»

¹⁶ Ntɛ Yesu eyi kəcepər agbɛp ɲa kəba ka Kalile kəsək mə, k'ɛnəŋk Simɔŋ kɔ Andərə wɛnc ka Simɔŋ, ɲacgbal manta dəkəba, bawo awɛnt ɲɔ ɲanayɔnɛ.

¹⁷ Kɔ Yesu oloku ɲa: «Nəder nəcɛps'ɛm darəŋ, indəsɔŋɛ nu kəyɔnɛ awɛnt a afum.»

¹⁸ Gbəncana babəkɔ kɔ ɲasak manta maŋan kɔ ɲancəmɛ Yesu darəŋ.

19 Ntə ɔŋkə kirin pəpic mə, k'ənəŋk Sak wan ka Sebede kə wənc Isan aŋe ɲanayi abil ɲaŋan disre ɲaclompəs-lompəs manta mə.

20 Gbəncana babəkə k'ewe sə akakə mərəŋ ntə təŋsəŋe ɲayəne aɕepsə ɔn mə. Kə ɲasak kas kəŋan Sebede debil kə akə ɲacbəc mə, kə ɲancəpsə Yesu darəŋ.

Fum nwe ɲəŋk ɲələc ɲəntərəs kə mə

21 Kə ɲambərə dare da Kaparnam. Ntə ɲaŋkə dəkətola Kanu da aSuyif simiti, dəsək da kəŋesəm mə, kə Yesu oncop kətəkse.

22 Cusu cənawos ɲa kətəkse kən, bawo enctəkse pəmə fum nwe ɔntəmpər kətam mə, enctəkse fə pəmə atəkse sariyə s'aSuyif.

23 Tənətəŋne wərkun wələma nwe ɲəŋk ɲələc ɲənabərə mə pəyi dəkətola Kanu da aSuyif dadəkə disre, pəckulə-kulə:

24 «Ta ake tə məmbərəne mes mosu-ε, Yesu wəka Nasaret? Dəkələsər su mənder ba? Səncərə belbel nwe məyənə mə: Wəcəmpi wəka Kanu!»

25 Kə Yesu ɛŋgbəŋ-gbəŋər ɲi, pəcloku: Məməp kusu! Məwur fum wəkawə dəris.

26 Kə ɲəŋk ɲələc ɲowur kə dəris ɲecyikəc kə pəpəŋ, ɲockulə-kulə sə pəpəŋ.

27 Kə cusu cəwos afum fəp, ɲacgbəkələne taŋan: «Tere tə tante-ε? Kətəkse kəfu, dəbe dere! ɔntəmpər ali dəbe da yəŋk yələc, nyə yenlələs mosom mən mə!»

28 Kə debeki da tewe tən dəsaməsər katəna katəna məmpəmpə ma Kalile fəp.

Yesu entaməs acuy alarəm

29 Ntɛ ɲawur dəkətola Kanu da aSuyif mə, nkən Sak kə Isan ɲan̄kə ndena Simən̄ kə Andərə.

30 Iya wəka wəran ka Simən̄ ɛnafəntərə ta ɛntamnɛ-ɛ, fiba fənayi kə, gbəncana babəkə k'aloku Yesu tetən.

31 K'əncənɛ, k'osumpər kə kəca k'eyekti, kə fiba fəsak kə, k'eyerəs afum yeri.

32 Ntɛ dəfəy dender, kə dec dəɲkalɛ mə, k'an̄kɛɛ kə acuy fəp kə an̄ɛ yən̄k yɛlɛc yəntərəs mə.

33 Kə afum a dare fəp ɲalon̄kanɛ nde kusun̄ka ka dəkələ.

34 K'ɛntaməs acuy alarəm an̄ɛ ɲancunɛ docu ya-mayama mə, pəcbɛləs yən̄k yɛlɛc yɛlarəm. ɛncsak fɛ yən̄k yɛlɛc yolok-loku, bawo yɛnacərə kə.

Yesu ɲkətɛnɛ Kalile

35 Bətbət ta pəntayə wan̄kərə-ɛ, k'ɛyɛfɛ k'owur kəkə ka kəfo kəyer-yer kələma, k'ən̄kə pəcəmɛ kətola Kanu.

36 Simən̄ kə asol ən ɲambɛlkər kəten kə.

37 Ntɛ ɲanən̄k kə mə, kə ɲaloku kə: «Fəp fəyi kəten əm.»

38 Kə Yesu oloku ɲa: «Pan̄kən kəfo kələma, nde sədare nɛ sələtərnɛ mə, ntɛ tən̄sən̄ɛ dəndo sə idən̄k Kibaru Kətat mə, bawo itə iwurɛnɛ.»

39 Kə Yesu ɲkətɛnɛ atəf ɲa Kalile fəp, pəckawandi Kibaru Kətat dəkətola Kanu d'aSuyif, pəcbɛlsɛnɛ sə yən̄k yɛlɛc.

Yesu ɛntaməs wəcunɛ sɛn

40 Kə wəcunɛ sɛn wələma ender nnə Yesu eyi mə, k'ɛncəp suwu pəclɛtsɛnɛ Yesu: «Kə məfan̄ ti-ɛ, məntam kəsəkəs im.»

41 Kə Yesu əyənɛ kə nənəfər, k'ɛntɛnc kə kəca, k'on̄gbun̄ɛnɛ kə, k'oloku: «Ifan̄ ti, məsək!»

⁴² Gbəncana babəkə kə sen səsək kə, k'əsək.

⁴³ Kə Yesu embeləs kə pəctiŋ-tiŋ kə:

⁴⁴ «Ta məloku ti fum o fum, mba məkə məmentərne wəloŋne, məkenə kə polonje teta kəsəkəs kam pəmə təkə Musa encic ti mə, tendeyəne afum fəp kəcərə a məntamnə.»

⁴⁵ Mba wərkun nwe, nte nkən əŋkə mə, k'eyefe kədəŋk ti pəpəŋ, pəcsamsərəne toloku tatəkə, kə təsəŋe Yesu kətatam sə kəberə dare. Dare kəsək encyi, mofo meyer-yer mmə afum ŋanatə kəcyi mə, afum ŋancder kə kəyefe mofo fəp.

2

Yesu kətaməs kən fum wətatam kəkət

¹ Nte mata mələma mencepər mə, kə Yesu ender Kaparnam. K'ane a Yesu eyi dəkər,

² k'afum alarəm ŋalonkanə haŋ kə dəkəcəmə delip ali nde dəkəsunja. Yesu pəccam ŋa toloku ta Kanu.

³ K'əŋkərə kə wəfi wəcək nwe afum maŋkələ ŋanagbaŋne mə.

⁴ Nte agbaŋne on ŋanatətam kəkekərə kə haŋ nde Yesu eyi mə teta dəlay da afum, kə ŋampəsə kələ kəronj* ŋasurene da Yesu enacəmə mə, kə ŋafeni da ŋanatorene yala nyə wətatam kəkət wəkəkə enafəntərə mə.

⁵ Nte Yesu enəŋk kəlaŋ kəŋan mə, k'oloku wəfi wəcək: «Wənc im, aŋaŋnen'am kiciya kam.»

⁶ Atəkse sariyə s'aSuyif ələma aŋe ŋanandə di mə, ŋaccəm-cəmnə dəbəkəc nte:

* **2:4** Dəndo atəf ŋa Palestin, aŋsalkən di wələ darenc, nte tənşəŋe afum ŋactam kəcpe wələ kəronj, ŋacsali mə.

7 «T'ake tɔŋlok-lokɛ tantɛ-ɛ? Kɛlɔmɔs k'endɛ Mariki! An'entam kɛŋaŋnɛnɛ kiciya kɔ pɛntɔyɔnɛ Kanu sona-ɛ?»

8 Kɔ Yesu ɛncɛrɛ gbɛncana babɔkɔ amera ŋɔn disrɛ mɛcɛm-cɛmnɛ mmɛ mɛnayi atɔksɛ sariyɛ akakɔ mɔ. Kɔ Yesu eyif ŋa: «T'ake tɔ mɛcɛm-cɛmnɛ mamɛ meyinɛ nu-ɛ?

9 Mosom mɛrɛŋ mɔ mamɛ, tosom tere tɔtɔcuca kɛlɔku wɛfi wɛcɛk-ɛ: «Aŋaŋnɛn'am kiciya kam,» kɔ kɛlɔku: «Mɔyɛfɛ, mɛlɛk pɔkɔ pam, mɛkɔt?»

10 Awa, indeyɔ nu tantɛ, ntɛ tɔŋsɔŋɛ nɛcɛrɛ a ina, Wan ka Wɛrkun, intɔmpɛr kɛtam kɛŋaŋnɛnɛ ka kiciya nnɔ doru dandɛ.» Kɔ Yesu oloku wɛfi wɛcɛk:

11 «Ilok'ɔm: Mɔyɛfɛ, mɛlɛk pɔkɔ pam, mɛkɔ nde ndaram!»

12 Kɔ wɛrkun nwe ɛyɛfɛ, k'ɛlɛk gbɛncana babɔkɔ pɔkɔ pɔn, k'owur fɔr ya afum fɛp kirin, ntɛ towosɔs afum cusu mɔ, kɔ fɛp fɛŋkor-koru Kanu ŋacloku: «Sɛntanɛŋk fɛ towurɛnɛ ta tantɛ!»

Yesu ewe Lewy kɛcɛpsɛ kɔ darɛŋ

13 Kɔ Yesu ŋkɔ sɔ kɛca ka dɛkɛba. Kɔ afum alarɛm ŋander nnɔ eyi mɔ, pɛtɔksɛ ŋa.

14 Ntɛ eyi kɛcɛpɛr mɔ, k'ɛnɛŋk Lewy wan ka Alfe, pɛndɛ nde aŋgbancan ŋa abanɔs dut. Kɔ Yesu oloku kɔ: «Mɛcɛps'ɛm darɛŋ,» kɔ wɛkakɔ ɛyɛfɛ k'ɛncɛpsɛ kɔ darɛŋ.

15 Ntɛ ŋanadi yeri nda Lewy, kɔ abanɔs dut alarɛm kɔ aciya ŋandɛ kɔ Yesu kɔ acɛpsɛ ɔn, bawo afum akakɔ ŋanacɛpsɛ kɔ darɛŋ mɔ, ŋanala.

16 Ntɛ aFarisi kɔ atɔksɛ sariyɛ s'aSuyif † ŋanɛŋk

† 2:16 *WɛFarisi/aFarisi* = Kɛgba k'abeki aSuyif aŋɛ ŋacɛpɛrɛr ŋasektɛrɛnɛ sariyɛ kɔ mɔyɔ mokur ma aSuyif mɔ.

Yesu pæcdi yeri kō abanəs dut kō aciya mō, kō ŋayif acēpsē a Yesu darəŋ: «Ta ake t'endine yeri kəfo kin kō abanəs dut kō aciya-ε?»

¹⁷ Yesu nwe ɛnane ti mō, oloku ŋa: «Bafō atamnē ŋafan wəten cōl de, mba acuy. Inderenē fē teta kəwe k'alompu, mba teta aciya.»

Yesu kō kusun

¹⁸ Dəsək dələma, acēpsē a San darəŋ kō aFarisi ŋasun. K'afum alōma ŋander ŋayif Yesu: «T'ake tō acēpsē a mēna darəŋ ŋantəsunē-ε, ntē acēpsē a San darəŋ kō aFarisi ŋanəsun mō?»

¹⁹ Kō Yesu eyif ŋa: «Afum anē awe kəgbanē mō ŋantam kəsun ŋasəryi wəfura kəsək ba? Tēm ntē ŋayi wəfura kəsək mō, ŋafəsun.

²⁰ Dəsək dendeβəp ndē ŋandegbeyenē kō wəfura mō, awa ŋandesun dəsək dadəkō.»

²¹ «Ali fum əfəfapərə kəpəl ka kəloto kəfu yamos yemācē-mācē, kō pəyənē fē ti-ε kəpəl ka kəloto kəfu kəŋkō kəŋŋos-ŋosu yamos yemācē-mācē yayəkō, təsəŋe yamos yayəkō kəwale pətəs kəwale kəcəkō-cəkō.

²² Fum o fum əfəβer wən wofu dətələba pa akata pokur, kō məyō ti-ε, wən wəŋwesəli tələba, məyi oŋ məsətō fē wən, məsətō fē sō tələba. Wən wofu, dətələba pofu!»

Yesu kō dəsək da kəŋesəm ndē ampuse Mariki mō

²³ Dəsək dələma da kəŋesəm ndē ampuse Mariki mō, Yesu pæccali dale, acēpsē ɔn darəŋ ŋasol kō nkən, kō ŋayefē kəcŋosuru səbomp sa mēŋbən.

²⁴ Kō aFarisi ŋayif Yesu: «Məcəŋkəl! Ta ake tō ŋanəyənē ntē Sariye səntəwosē kəyō dəsək da kəŋesəm ndē ampuse Mariki mō?»

²⁵ Kə Yesu eyif ɲa: «Ali katin nəkaraŋ fɛ dəYecicəs Yosoku təkə Dawuda ɛnayo nte ɛnayi dəpəcuca, dor dəyo kə, nkən kə akə ɲanasol mə ba?

²⁶ Nte Dawuda ɛnabere kələ ka Kanu disre tem ta wəkirin ka alonɲe Abiyatar mə, pəsəm cəcom nce anclonɲe Kanu, cəcom nce Sariye sənawose alonɲe gbəcərəm kəsəm mə. Mba Dawuda ɛnasəm ci, k'əsɔɲene sə cələma asol ɔn.»

²⁷ Kə Yesu oloku ɲa: «Kanu kənawure dəsək da kəɲesəm nde ampuse kə mə teta kəmar ka afum, mba kənawure fɛ afum teta dəsək da kəɲesəm de!

²⁸ Ti tɔyɔne Wan ka Wərkun ɔyɔne mariki ali ma dəsək da kəɲesəm nde ampuse Mariki mə.»

3

Yesu ɛntaməs wərkun dəsək da kəɲesəm nde ampuse Mariki mə

¹ Kə Yesu olukus nde dəkətola Kanu da aSuyif. Dəndo, wərkun wələma ɛnayi di pədəmtər kəca.

² Kə aFarisi* ɲaŋkəkce kə pəyɔne a Yesu ɔŋkətaməs kə dəsək da kəɲesəm nde ampuse Mariki mə-ɛ, nte tɔɲsɔɲe ɲayemsene kə mə.

³ Awa, k'oloku wərkun nwe ɛnadəmtər kəca mə: «Məyefe məcəme nnə afum daco.»

⁴ Kə Yesu eyif ɲa: «Cəke cə Sariye səwose dəsək da kəɲesəm nde ampuse Mariki mə-ɛ: Kəyo ka pətət ba, ka pələc? Kəyac fum ba, ka kədif kə?» Mba kə akakə ɲancaŋk.

⁵ Awa, kə Yesu ɔməməɲ ɲa dəcəro fəp faɲan dəmətele disre, kə kətɔyɔne kəɲan nənəfər kəntərəs

* **3:2** *WəFarisi/aFarisi* = Kəgba k'abeki aSuyif aɲe ɲacepərər ɲasektərəne sariye kə məyo mokur ma aSuyif mə.

kɔ dɛbəkɛc. K'oloku wɛrkun nwɛ: «Mɛtenci kɛca!»
Kɔ wɛrkun nwɛ entenci ki, kɔ kɛca kɔn kɛntamɛ.

⁶ Kɔ aFarisi ɲawur dɛkɛtola Kanu danɲan
kɛkɔnɲkɛnɛ kɔ afum a Herodu nte tɔɲsɔɲɛ ɲatɔɲɲɛ
tedifɛ ta Yesu mɔ.

Afum alarɛm ɲander Yesu

⁷ Kɔ Yesu ɔɲkɔ ntende dɛkɛba kɔ aɛpsɛ ɔn darɔɲ.
Kɔ kɛnay k'afum kɛncɛmɛ Yesu darɔɲ, aɲɛ ɲanayɛfɛ
tɔf ya Kalile kɔ Yude mɔ,

⁸ aka Yerusalem, aka Idume, aka mokuru ma
kɛɲgbɔkɔ ka Yurdɛn kɔ akɔ ɲayi Tir kɔ Sidɔɲ kɛsɛk
mɔ. Kɛnay k'afum kɛɲkɛ ɲancɛnɛ mɛs fɛp mɛmɛ Yesu
ɔncyɔ mɔ, kɔ ɲander nnɔ eyi mɔ.

⁹ Kɔ Yesu oloku aɛpsɛ ɔn darɔɲ a ɲalompɛ kɔ abil
ɲin, nte tɔɲsɔɲɛ ta kɛnay kɛdegɛbɛcɛrɛnɛ kɔ mɔ.

¹⁰ Bawo ɛnctamɛs afum alarɛm, akɔ ɲanayɔ docu
mɔ fɛp ɲancmɛpɛnɛ kɔ nte tɔɲsɔɲɛ ɲatam kɛgbuɲɛnɛ
kɔ mɔ.

¹¹ Nte yɔɲk yɛlɛc yɛncɛnɲk Yesu mɔ, yonc-
tontɛnɛ kɔ dɛntɔf, yockulɛ-kulɛ: «Mɛna, Wan ka
Kanu mɛyɔnɛ!»

¹² Mba Yesu pɛctiɲ-tiɲ yi, pɛcmɔnɛ yi kɛloku
afum nwɛ ɔyɔnɛ mɔ.

Yesu ɛyɛk-yɛk asom ɔn wɛco kɔ mɛrɔɲ

¹³ Kɔ Yesu ɛmpɛ nde tɔrɔ kɛrɔɲ, k'ewe akɔ ɛnafan
mɔ, kɔ akakɔ ɲander nnɔ eyi mɔ.

¹⁴ K'ɛyɛk-yɛk afum wɛco kɔ mɛrɔɲ, k'ɔsɔɲ ɲa tewe
ta «asom», nte tɔɲsɔɲɛ ɲayi kɔ nkɔn, pɛcsom ɲa
kɛkɔdɔɲk Kibaru Kátót mɔ,

¹⁵ k'ɔsɔɲɛnɛ ɲa sɔ dɛbɛ dɛbɛlsɛnɛ yɔɲk yɛlɛc.

¹⁶ Mewe ma afum wəco kə mērəŋ aŋe ənayək-yək mə mamɛ: Siməŋ nwɛ Yesu ənəsəŋ tewɛ ta Piyər mə,

¹⁷ Sak wan ka Sebede, kə Isan wənc ka Sak aŋe ənəsəŋ tewɛ ta «Bowanɛrsɛs» mə. Itə tatəkə «Awut a pəkulɛ-kulɛ pa dɛwɛ».

¹⁸ Kə Yesu endənər sə Andərə, Filip, Bartelemy, Matiye, Təma, Sak wan ka Alfe, Tade, Siməŋ wəKanaŋ,

¹⁹ kə Yudas wəka dare da Keriyot nwɛ ənader pəbər Yesu atɛrɛnɛ ɔn dəwaca mə.

Afum a Yesu ŋafan kəkəkərɛ kə dɛkər

²⁰ Ntɛ tencepər mə, kə Yesu olukus ndɛ ənayɪ decikəra mə, kə afum ŋalonkanɛ sə. Yesu kə acɛpsɛ ɔn darəŋ ŋanatam fɛ kədi yeri yati.

²¹ Ntɛ aka kələ disrɛ a Yesu ŋane ti mə, kə ŋawur kəkəsumpər kə, bawo ŋanaloku: «Dotonkulu deyɪ kə.»

Yesu ɛŋgbɛkəl yem nyɛ amboncɛ kə mə

²² Atəkɛ sariyɛ s'aSuyif aŋe ŋanayɛfɛ Yerusalem mə ŋaloku: «Yesu ɔyɔ Bɛlsɛbul, wəkiriŋ wəka yəŋk yɛlɛc! Nkən ɔŋsəŋɛ Yesu kəbɛləs ka yəŋk yɛlɛc!»

²³ Kə Yesu ewɛ ŋa pəctəkɛ ŋa mɛs pəctubcɛnɛ mi mələm: «Cəke cə Sentani səntam kəbɛləs Sentani-ɛ?

²⁴ Kə atəf ŋeyerɛnɛ ŋisərka-ɛ, atəf ŋaŋəkə ŋəfəsətam kəcəmə.

²⁵ Kə aka kələ kin ŋayerɛnɛ tanan-ɛ, kələ kanəkə kəfəsətam kəcəmə.

²⁶ Awa, kə Sentani səyɛfərɛnɛ sisərka-ɛ, səfətam kəcəmə gbɪŋ. Ta si tɛŋlip tɛm tatəkə.

²⁷ Ali fum ɔ́fótam káberɛ kɛ́lɔ́ ka wáka sákát disrɛ, páfɔ́nɔ́t daka dɔ́n ta onuńkɛnɛ pàsekát wáka sákát wákakɔ́-ɛ, a pàdefɔ́nɔ́t daka da kɛ́lɔ́ kɔ́n.

²⁸ Kance ícłoku nu ti, andenɔ́nɔ́nɛnɛ afum kiciya kɔ́ kɛ́lɔ́màs nkɛ ɲalɔ́màs Mariki mɔ́ fɛ́p,

²⁹ mba nwɛ o nwɛ ɔ́ɲlɔ́màs Amera Nɛcempi ɲa Kanu mɔ́, afɔ́dekɔ́nɔ́nɛnɛ kɔ́, endesarɛ kiciya kan_kɔ́ doru o doru.»

³⁰ Kɔ́ Yesu ołoku ɲa ti, bawo ɲanaloku: «ɲɔ́ɲk ɲɛlɛc ɲeyi kɔ́.»

Iya kɔ́ awɛnc a Yesu

³¹ Iya kɔ́ awɛnc a Yesu ɲander, ɲacámɛ daban_ka, kɔ́ ɲasom pawɛnɛ ɲa Yesu.

³² Kɛ́náy ka afum kɛ́nandɛ kákel kɔ́, k'aloku kɔ́: «Iya kam, awɛnc ə́m aɲa arkun kɔ́ aran ɲancámɛ daban_ka, mən'ɔ́ ɲayi káten.»

³³ Kɔ́ Yesu ołoku: «Iya kem k'awɛnc im aɲa, are ɲɔ́-ɛ?»

³⁴ K'ɔ́nkɔ́tɛnɛ fɔ́r káməmən ka akɔ́ ɲanandɛ ɲakɛl kɔ́ mɔ́, k'oloku: «Iya kem k'awɛnc im aɲa ɲ'akanɛ!

³⁵ Bawo nwɛ o nwɛ endeyɔ́ tɛfan_ ta Kanu mɔ́, nkɔ́n ɔ́yɔ́nɛ wɛnc im, wákirɛ kɔ́ iya kem.»

4

Totubcɛnɛ ta wə́bɔ́f

¹ Kɔ́ Yesu oluksərɛnɛ sɔ́ káctákse nde agbɛp ɲa kába. Kɔ́ kɛ́náy ka afum alarəm kɛ́n_kɔ́ kɛ́lɔ́ɲkanɛ nnɔ́ eyi mɔ́, kɔ́ tɔ́sɔ́ɲɛ kɔ́ kábeke debil, k'endɛ. Kɔ́ kɛ́náy ka afum akakɔ́ fɛ́p kɛ́ncámɛ agbɛp ɲa kába.

² Kɔ́ Yesu ɛ́ntákse ɲa mes mɛlarəm pətubcɛnɛ mi mɔ́lɔ́m, k'oloku ɲa káctákse kɔ́n disrɛ:

³ «Nə́cə́ɲkəl: Kɔ́ wə́bɔ́f owur kəkɔ́gbal defet.

⁴ Nte encgbal defet má, kó mēngben málóma mēntēmpenē dápó, mba kó bēmp yender yósám mi.

⁵ Kó mēngben málóma mēntēmpenē antóf ɲa masar kəron ɲde kəbof kəlarəm kənatóyi má. Nte antóf ɲenadəm má, kó mēngben maməkó mompon katəna.

⁶ Mba nte nne yēnadewonē má, kó buma yayókó yowosərənē, bawo yēnayó fē ncənc.

⁷ Kó mēngben málóma mēntēmpenē dəbēɲk, kó bēɲk yēmpē kó yendi mi, kó təɲsəɲē mēngben mótót kətəkom.

⁸ Kó mēngben málóma mēntēmpenē antóf ɲótót kəron, kó mompon kó mēsəɲk, kó mēləpsər kəsəɲ yokom. Kó málóma monkom wəco maas (30), málóma wəco camət-tin (60) kó málóma tasar tin (100).»

⁹ Kó Yesu oloku: «Məna nwe mənɲó ləɲəs yēnēnē má, mənē ti!»

Ta ake tó Yesu ɛnctəksɛ dəmotubcɛnɛ-ɛ?

¹⁰ Nte ɲangbéyɛnē kəsək má, acɛpsɛ a Yesu darəɲ aɲ wəco kó mɛrəɲ kó akó ɲaɲkəl kó má ɲayɛfɛ kəyifət kó teta mes mɛɛ ɛnctəksɛ ɲa pətubcɛnɛ mi máləm má.

¹¹ K'oloku ɲa: «Nəna ɲó Kanu kəsəɲē kəcərə kance kəgbəpnɛ ka dəbɛ da Kanu, mba akó, motubcɛnɛ gbəcərəm má ɲane,

¹² ti təsəɲē nte: «ɲangbətɛ belbel, mba ɲafənəɲk, təsəɲē ɲaccəɲkəl belbel, mba ɲafəcərə tələm o tələm, pətóyənē ti-ɛ, kó ɲaluksərɛ Kanu, Kanu kəɲaɲnɛnɛ ɲa!»

Yesu oloku tedisɛ ta totubcɛnɛ ta wəbɔf

13 Kə Yesu eyif ɲa sɔ: «Nəncərə fɛ totubcənɛ tante! Awa, cəke cɔ nəntam kəcərə motubcənɛ fəp-ɛ?

14 Wəbɔf, Toloku ta Kanu t'əmbɔf.

15 Afum aɲɛ ɲayi dɔpɔ daco mə, ɲ'ambɔfɛ Toloku ta Kanu. Kə ɲane ti-ɛ, gbəncana babəkɔ Sentani səder səbaɲər ɲa Toloku Tətət nte anabɔf ɲa mə.

16 Kə mɛɲgbɛn məkɔ anabɔf kəfo ka masar mə, məyɔnɛ afum aɲɛ ɲaɲne Toloku, ɲaban ti pəbotu disrɛ,

17 mba ɲafɔwosɛ ncɔnc* kətor ɲa, pəpic pɔ ɲancəmɛ ti darəɲ. Kə pəcuca kə kətərəs kənder teta Toloku tatəkɔ-ɛ, ɲasak ti fɛw gbəncana babəkɔ.

18 Anabɔf məlɔma dəbɛɲk, ɲa ɲayɔnɛ afum aɲɛ ɲaɲne Toloku ta Kanu,

19 mba pəyɛɲki pa tɛm tatəkɔ, pəbas pa daka kə mes məlɔma medi toloku tatəkɔ, tɔsɔɲɛ ti kətəkom.

20 Tɛlpəs, anabɔf məlɔma antɔf ɲətət. Antɔf ɲətət ɲəyɔnɛ afum aɲɛ ɲaɲne toloku ta Kanu, ɲaban ti, ɲasɔɲɛ ti kəkom, nte wəco maas (30), təkɔ wəco camət-tin (60), kə təlɔma tasar tin (100).»

Totubcənɛ ta lamp

21 Kə Yesu eyif ɲa sɔ: «Ambər lamp dəkəfala kə pəyɔnɛ fɛ ti kəfənc dəntɔf ba? Bafɔ andet di kədet dəm ba?

22 Bawo nte o nte tɔɲgbɔpnɛ mə, tendewur dəsək dɔlɔma. Nte o nte tɔyɔnɛ tɔgbɔpnɛnɛ mə, mɛnɛ tedewur tɔyɔ afum wəɲkəra.

23 Kə fum ɔyɔ ləɲəs yenenɛ-ɛ, pəne ti!»

24 Kə Yesu oloku ɲa sɔ: «Nəkɛmbərɛnɛ təkɔ nəɲne mə: Potubcɛ pəkɔ nəntubcɛ akɔ mə, ip'andekəsɔtubcɛ nu, padɛɲərənɛ nu sɔ.

* **4:17** Kəncɔnc, ncɔnc = «kəntɛntəl», «ntɛntəl»

²⁵ Wəkə əyə pəlarəm mə ambərənə kə sə, mba wəkə əyə pepic mə, ambanjər kə yati pəkə əyə mə.»

Totubcənə ta mənjbən mmə momponj misərka mə

²⁶ Kə Yesu oloku sə: «Dəbə da Kanu deyɪ pəmə ntə wərkun endewur pəcgbal mənjbən məbəf dəntəf mə,

²⁷ təyənə a endirə kə endirə fə-ε, pibi kə danj, mənjbən momponj, məbək ta encərə ti ntə o ntə-ε.

²⁸ Antəf nənsənə yəbəf kəponj: Antəf nəsərka nənsənə yəbəf kəponj: Pəcop buma, mənjbən mocop kəwurəs dəbuma, məlas.

²⁹ Mənjbən mənckənaləl, pabər mi kətetiya, bawo təm tətəl ta mi tərbəp.»

Totubcənə ta tənjbən tətət

³⁰ Kə Yesu eyif sə: «Ak'andətotubcənə dəbə da Kanu-ε? Totubcənə tere t'andelokə di-ε?

³¹ Dəbə da Kanu deyɪ pəmə tənjbən tətət mpə ambəf pəfətə pətəs yəbəf ya dəntəf fəp mə,

³² mba k'ambəf pi-ε, pəpə pəbək pətəs yəbəf fəp ya dəlakə, pəsən wara wəpən təsənə bəmp ya darenc kəctam kəndə katəkəp ka ki dəntəf.»

³³ Dəmotubcənə məlarəm Yesu oncloku nə moloku ma Kanu, kəbəp ka təkə nəctam kəcərə mə.

³⁴ Yesu onclok-lokər fə afum fəp ta pəyənə motubcənə-ε, mba kə nənjbəynə-ε, oncloku acəpsə ən darən tedisrə ta mi fəp.

Yesu ontore-tore afef

³⁵ Dəsək dadəkə yati ntə pəmbiyə mə, kə Yesu oloku acəpsə ən: «Pacali ntende mokuru.»

³⁶ Ntɛ aɕɛpsɛ ɔn darɛŋ ɲasak kɛnay ka afum mɔ, Yesu pɛyi debil kɔ ɲaɲkekɛrɛ kɔ. Cibil cɛlɔma cɛnayi kɔ kɛsɛk.

³⁷ Kɔ afɛf ɲɔpɔŋ ɲɛyɛfɛ kɛwɜr, yam yɛɕbɛrɛ debil haɲ kɔ abil ɲɛfaɲ kɛlarɛ domun.

³⁸ Yesu nkɔn pɛfɛntɔrɛ, pɛfakɛnɛ pɛdɛmɔt, pɛɕdirɛ ndɛ abil darɛŋ. Kɔ aɕɛpsɛ ɔn ɲantimi kɔ ɲaɕloku: «Wɛtɛksɛ, kɛfi kɔ sɛnder, kɔ mɛyi ta mɛwɛ ti daka-ɛ?»

³⁹ Ntɛ entimɛ mɔ, k'ɛɲgbɔŋ-gbɔŋɛr afɛf, k'oloku kɛba: «Mɛɕaɲk, mɛtor!» Kɔ afɛf ɲɛsak, kɔ pɛyɔ yɛɲ!

⁴⁰ Kɔ Yesu eyif ɲa: «Ta ake tɔ nɛfɛrɛnɛ fɔr tantɛ-ɛ? Nɛntayɔ fɛ kɛlaɲ haɲ ndɛkɛl ba?»

⁴¹ Kɔ kɛnɛsɛ kɛpɔŋ kɛsɜmpɛr ɲa, kɔ ɲayifɛnɛ aɲɛ kɔ akɔ: «Ake fum wɛkawɛ ɔyɔnɛ-ɛ, ntɛ afɛf kɔ kɛba yɛncɛmɛ tɛfaɲ tɔn darɛŋ mɔ?»

5

Yesu entamɛs wɛrkun nwe yɔɲk yɛlɛɕ yɛnayi mɔ

¹ Kɔ Yesu ɔɲkɔ ntɛndɛ kɛba mɔkuru ndɛ kulum ka Kerasa.

² Ntɛ ɛndɛwɜr debil mɔ, kɔ fum wɛlɔma owur cufu dacɔ, ɲɔɲk ɲɛlɛɕ ɲɛyi kɔ. K'ɛndɛr pɛɕɛmɛ kɔ fɔr kirin.

³ Fum wɛkakɔ dɛndo cufu dacɔ ɛnayi, fum o fum ɛntam fɛ kɛkɔt kɔ, ali gbɛkɕɛ.

⁴ Tɛlarɛm ɔncyɔ fɛɕ dɛwɛɕɛk packɔtɛ kɔ gbɛkɕɛ, mba onccɔpu gbɛkɕɛ pɛɕtɛp-tɛpi fɛɕ, ali fum ɛnayɔ fɛ sɔkɛt sɛɕɛmbɛrɛ kɔ.

⁵ Pɛyi dɛndo cufu dacɔ kɔ mɔrɔ kɛrɔŋ tɛm fɛp, pibi kɔ daɲ, pɛɕkulɛ-kulɛ, pɛɕbɔpɛrɛnɛ masar.

⁶ K'ɛnɔɲk Yesu pɛbɔlɛ, k'ɛndɛr pɛɕɛpɛ kɔ suwu fɔr kirin,

⁷ k'òṅkule-kule pəpəṅ: «Yesu Wan ka Kanu nkɛ kəyi darenc mə, ta ake tɔ məmbɛrɛnɛ mes mem-ɛ? ɪlətsɛn'am teta tewɛ ta Kanu, ta mətərəs im!»

⁸ Bawo Yesu ɛnaloku kɔ: «Məwɔr wərkun wəkawɛ, məna ṅəṅk ṅɛləc.»

⁹ Kɔ Yesu eyif kɔ: «Cəke cɔ aṅw'am-ɛ?» K'oloku Yesu, «Kənay» k'aṅw'em, bawo səla.»

¹⁰ K'ɛṅgbəcər kəletsɛnɛ Yesu a ta pəsəṅɛ kɔ kəwɔr dəkulum.

¹¹ Dəndo tərɔ kəron sɔp yɛlarəm yɛnayi di yɔcsəmət.

¹² Kɔ yəṅk yɛləc yɛletsɛnɛ Yesu: «Məkekərə su ndɛ sɔp yayɛ yeyi mə, ntɛ təṅsəṅɛ səbɛrɛ yi disrɛ mə.»

¹³ Kɔ Yesu owosɛnɛ yi. Kɔ yəṅk yɛləc yowɔr dəfum kɔ yɛmbɛrɛ dəsɔp, kɔ sɔp yɛyɛksɛ kətor dəkəba yɛyɛfɛ dətərɔ. Dɛlay da sɔp yayəkɔ dɛncbɔp wul mərəṅ (2.000). Kɔ yɛṅgbətsɛ, kɔ yɛfis-fis dəndo dəkəba.

¹⁴ K'akɛk a sɔp aṅɛ ṅayɛksɛ kɔ ṅasamsərənɛ toloku tatəkɔ dare kɔ sədare səkəsək, kɔ afum ṅander kədəməmən təkɔ tənacɛpər mə.

¹⁵ Ntɛ ṅander nnɔ Yesu eyi mə, kɔ ṅambɔp fum wəkɔ ṅəṅk ṅɛləc ṅəntərəs mə, pəsəkɔp pəndɛ kɔ amera ṅən fɔp, nkən nwe «kənay» kənayi mə. Afum aṅɛ ṅanader kəməmən mə, ṅanɛsɛ.

¹⁶ Afum akɔ ṅananəṅk təkɔ tənacɛpər mə, ṅaləmər adɛr təkɔ tɛnasɔtɔ wəkɔ yəṅk yɛləc yəntərəs mə kɔ sɔp.

¹⁷ Awa! Kɔ ṅayɛfɛ kəletsɛnɛ Yesu, a pəbɔlɛ atɔf ṅaṅan.

¹⁸ Ntɛ ɔṅkɔ kəbɛrɛ debil mə, fum nwe yəṅk yɛləc yəntərəs mə ɛlətsɛnɛ Yesu a pəwosɛ ṅayi kɔ nkən.

¹⁹ Yesu ɛnawosɛnɛ fɛ kɔ ti, mba k'oloku kɔ: «Məkɔ ndaram, ndena afum am, mələmər ṅa mes mmɛ

Mariki ɔyón'am mɔ fəp, nɔnɔfɔr nde ɔyón'am mɔ.»

²⁰ Kɔ fum nwɛ yɔŋk yɛlɛc yɛnayi mɔ ɔŋkɔ pɛcɔp kədəŋk dəsədare Wəco mes mmɛ Yesu ɛnayɔnɛ kɔ mɔ fəp. Kɔ tenciyanɛ afum fəp.

Wan ka Yayirɔs kɔ wəran wəcu

²¹ Kɔ Yesu ɔŋkɔ nde kəba mokuru, kɔ afum kənay ŋalɔŋkanɛ kɔ kəsək, nkɔn pəyi kəba kəsək.

²² Kɔ wəkiriŋ ka dəkətola Kanu da aSuyif, nwɛ ancwe Yayirɔs mɔ ender. Ntɛ ɛnəŋk Yesu mɔ, k'ontontnɛ kɔ dəntɔf, k'osumpər kɔ wɛcək.

²³ K'ɛlɛtsɛnɛ kɔ pəlarəm: «Dəkəfi wəyɛcərə kem eyi. Məder mədɛŋər kɔ waca, ntɛ tɔŋsɔŋɛ pətamɛnɛ pəyi sɔ doru mɔ.»

²⁴ Kɔ Yesu ŋaŋkɔ kɔ fum nwɛ. Kɔ kənay ka afum kəsɔl kɔ ŋa, ŋacɔbəcərənɛ kɔ cəsək fəp.

²⁵ Dəndo, wəran wəlɔma ɛnayi di, docu da kəwur mecir deyɪ kɔ tɛnasɔtɔ meren wəco kɔ mɛrəŋ.

²⁶ Tɛnatɔrɔs wəran wəkakɔ pəlarəm, teta atɛn cɔl aŋɛ ɛnanəŋk, pəsɔŋsɛ ti daka dɔkɔ ɛnayɔ mɔ fəp, mba ali mɛtɛn ɛnasɔtɔ fɛ, mɛnɛ ntɛ docu dɔn dɛncnaŋkanɛ kɔ mɔ.

²⁷ Ntɛ wəran nwɛ ɛnɛ paclɔku teta Yesu mɔ, k'ender kənay ka afum tadarəŋ, k'ɔŋgbuŋɛnɛ yamos ya Yesu,

²⁸ bawo onclɔkunɛ: «K'ɪŋgbuŋɛnɛ yamos yɔn-ɛ, intamɛnɛ.»

²⁹ Gbəncana babɔkɔ kɔ docu dɔn da kəwur mecir dɛsakɛ, k'ɛncərənɛ dərɪs a docu dɔn dɛntamɛnɛ.

³⁰ Kɔ Yesu ɛncərə gbəncana babɔkɔ a səkət səlɔma səwur kɔ dərɪs, k'ɛŋkafəlɔrnɛ kənay pəcyif: «Anɔ ogbuŋɛnɛ yamos yem-ɛ?»

³¹ Kə aɕɛpɛ ɔn darəŋ ɲaloku kə: «Mənəŋk ntɛ kənay kəŋgbəcərən'am waca fəp mə, məcyif sɔ a anɔ ogbuŋɛn'em-ɛ?»

³² Mba k'ɛŋkafəli fər kəməmən nwɛ ɛnagbuŋɛnɛ yamos yən mə.

³³ Ntɛ ɛnacərə təkə teyi kə mə, kə wəran ɛyɛfɛ kəyikɕɛ, k'enesɛ, k'ender pətɛmpɛnɛ kə wɛɕək dəntɔf, k'oloku kə kance fəp.

³⁴ Mba kə Yesu oloku kə: «Wan kem, kəlan kam kəntaməs əm, məkənɛ abəkəɕ ɲoforu, docu dam dɛntamn'am.»

³⁵ Yesu ɛnayi kəlok-loku ntɛ afum ɲanader kəyɛfɛ ka ndena wəbɛ ka dəkətola Kanu da aSuyif mə, ɲacloku Yayirɔs: «Wan kam wəran efi, ta ake tɔ məndəsɔtɔrɛ wətəkɛ-ɛ?»

³⁶ Mba Yesu ɛnaləm fɛ moloku manjan ntɛ o ntɛ, k'oloku wəbɛ ka dəkətola Kanu da aSuyif: «Ta mənɛsɛ, məlan gbəcərəm.»

³⁷ Yesu ɛnawosɛ fɛ nwɛ o nwɛ pəcəmɛ kə darəŋ, mənɛ Piyɛr, Sak kə Isan wɛnc ka Sak.

³⁸ Kə ɲander ndena wəbɛ ka dəkətola Kanu da aSuyif, dəndo kə Yesu ɛnəŋk təkə afum ɲanckafələ-kafələ mə, afum ɲacbok, ɲackulɛ-kulɛ pəpəŋ.

³⁹ Kə Yesu ɛmbɛrɛ k'eyif ɲa: «Ta ake tɔ nəŋkafələnɛ-kafələnɛ, nəɕbok tantɛ-ɛ? Wan wəkawɛ efi fɛ, kədirɛ k'ɛndɛ.»

⁴⁰ Kə afum ɲayɛfɛ kəfani Yesu. Mba kə Yesu ɛmbɛləs ɲa fəp, k'ewɛ wəyɛcərə kas kə kɛrɛ kə akə ɛnasolɛ mə, k'ɛmbɛrɛ ndɛ wəyɛcərə ɛnayi mə.

⁴¹ K'osumpər wan wəran kəɕa, k'oloku kə: «*Talita kum*», itɔ tatəkə: «Wəyɛcərə, iclok'am, məyɛfɛ!»

⁴² Gbəncana babəkə kə wan wəran ɛyɛfɛ, k'oncop

kákót. Wáyecára wákakó enasótó meren wáco kó merəŋ, kó cusu cəwos ɲa pəpəŋ.

⁴³ Kó Yesu embenəsne ɲa, a ta fum o fum pəcərə ti, k'oloku ɲa kəsəŋ wan yeri.

6

Aka Nasaret ɲalan fe Yesu

¹ Nte Yesu eyefe di mɔ, k'ɔŋkɔ dare dɔn Nasaret, kó acəpsɛ ɔn ɲancəme kó darəŋ.

² Nte simiti, dəsək da kəŋesəm dəmbəp mɔ, k'eyefe kətəkse nde dəkətola Kanu da aSuyif. Kó afum alarəm acəŋkəl aŋe cusu cənawos teta metəkse mɔn mɔ, ɲaɲyiftene: «Deke mamɛ mənɲefe kó-ɛ? Kəcərə kəkətene mes kərə kó kanke asəŋ kó mɔ? Cəke cɔ waca wɔn wəɲɔ mes mɛwɛy-wɛy mamɛ-ɛ?»

³ Bafɔ kamder ɔfɔ, wan ka Mari, wenc ka Sak, Yoses, Yuda kó Siməŋ ba? Bafɔ akirɛ ɔn ɲayi su de daco ba?» Mes maməkó mɛnasəŋe ɲa kətəgbəkər kó kəlan.

⁴ Kó Yesu oloku ɲa: «Afɔfati kələləs sayibɛ, mɛnɛ nde ndəron, akomene ɔn daco kó aka kəlɔ kɔn disre.»

⁵ Ali tes tɛwɛy-wɛy enatam fe kəyɔ di, mɛnɛ nte enataməs acuy aloma, pədenər ɲa waca mɔ.

⁶ Kó pənciyanɛ Yesu, bawo aka di ɲanabut kəlan. K'encepər-cepər sədare səcəsək sa dɔtɔf fəp pəctəkse.

Kəsom ka acəpsɛ aŋe wáco kó merəŋ

⁷ Nte ewe acəpsɛ ɔn darəŋ wáco kó merəŋ mɔ, kó Yesu eyefe kəsom ɲa merəŋ merəŋ, pəcsəŋ ɲa fənəntər fətame yəŋk yelɛc.

⁸ K'endenjær ȝa kæcloku a ta ȝatǝmpǝrenǝ daka o daka teta dǝpǝ, mǝnǝ kægbǝ gbǝcǝrǝm. K'oloku ȝa: «Ta nǝtǝmpǝrenǝ kæcom, alǝba, ta nǝgbǝncǝnǝ pǝsam dǝfi,

⁹ mba nǝbǝrnǝ cǝfta cin gbǝȝ, ta nǝbǝrnǝ sǝburumus mǝrǝȝ.»

¹⁰ Kǝ Yesu oloku ȝa sǝ: «Kǝlǝ nke nǝmbǝrǝ mǝ, nǝȝi ki disrǝ han ȝǝȝfǝ kæfo kanjǝ.

¹¹ Kǝ tǝȝǝnǝ kæfo kælǝma afum ȝawosǝ fǝ kǝban nu, ȝawosǝ fǝ kæcǝȝkǝl nu, kǝ nǝnde kæȝȝfǝ di-ǝ, nǝkǝȝ kæfǝl ka wǝcǝk wonu, ti tendeyǝnǝ ȝa sedǝ a ȝanaban fǝ nu.»

¹² Kǝ acǝpsǝ ǝn ȝanjkǝ, ȝaccam ntǝ tǝȝsǝȝǝ ȝanjsǝkpǝr bǝkǝc, ȝanljomp.

¹³ Kǝ ȝambǝlǝs ȝǝȝk ȝǝlǝc ȝǝlarǝm, ȝacsop acuy alarǝm moro, ȝactamǝs ȝa.

Defi da Saȝ Batis

¹⁴ Kǝ Herodu nwǝ ǝnatǝmpǝr dǝbǝ da Kalile mǝ, ǝnǝ pacloku teta Yesu, bawo tewǝ tǝn tǝnasam, pacloku: «Saȝ ǝfǝ, wǝkǝ ǝncgbǝt dǝromun teta Kanu mǝ, nkǝn ǝfǝtǝ afi dacǝ, itǝsǝȝǝ ntǝ ǝntam kæȝǝnǝ mǝwǝȝ-wǝȝ mǝ.»

¹⁵ Alǝma ȝacloku: «Eli ǝfǝ,» alǝma ȝacloku sǝ: «Sayibǝ sǝ, nǝsǝ sǝwurǝnǝ sayibǝ sa tǝm tokur anjǝ mǝ.»

¹⁶ Mba ntǝ Herodu ǝnǝ mǝs mamǝkǝ mǝ, k'oloku: «Saȝ nwǝ inasom k'anjgbinti domp mǝ, nkǝn ǝfǝtǝ afi dacǝ!»

¹⁷ Herodu yati ǝnasom afum, ȝasumpǝr Saȝ ȝakot kǝ, ȝamber kǝ dǝbili teta Herodiyad wǝran ka wǝnc Filip, nwǝ Herodu ǝnabanjǝr kǝ pǝnǝncǝ mǝ.

¹⁸ Saȝ oncloku Herodu: «Sariȝǝ sǝmǝn'am kǝnǝncǝ wǝran ka wǝnc ǝm.»

19 Herodiyad ənater Saŋ pəfaŋ kədif kə, mba ənctam fə,

20 bawo Herodu əncsəŋ Saŋ pələl, pəcərə sə a wərkun wəlompu Saŋ əyənə, pəsək sə, Herodu ənckəkəs kə. Kə Herodu endecəŋkəl Saŋ-ə, pəncyi kə yamayama, mba kəcəŋkəl kən kəncbət kə.

21 Kə dəsək dende dəbəp ndə Herodu ənaboc kəsata ka teren toluksər ta kəkom kən mə, k'ewe asəŋkənə ən dəbə, abə asədar, k'abeki a Kalile kəkə di yeri.

22 Kə wan ka wəran kən Herodiyad embərə k'empisə, kə təmbət Herodu kə abə akə ŋanayi di mə. Kə Herodu oloku wəyecərə: «Məwer im paka mpə o mpə məfaŋ mə, isəŋ əm pi.»

23 K'əndərmə kə toloku ntə: «Mpə məŋwer im mə, iŋsəŋ əm pi, ali pəyənə dəbə dem kəsək kin.»

24 Kə wan wəran owur k'əŋkə pəyif kərə: «Ak'iŋkəwer kə-ə?» Kə kərə oloku kə: «Domp da Saŋ Batis.»

25 Kə wan wəran embəlkər kəluksərnə ndə wəbə eyi mə pəkəwer kə: «Ifaŋ a məsəŋ im gbəncana bambə depəlet domp da Saŋ Batis.»

26 K'abəc ŋembərə wəbə Herodu, mba teta kədəram kən kə akə ŋanayi di mə, ənafaŋ fə kəbupərə kədəram kən.

27 Kə wəbə osom gbəncana babəkə wəsədar a pəkərə kə domp da Saŋ. Kə wəsədar əŋkə pəgbinti Saŋ domp dəbili.

28 K'əŋkərə domp da Saŋ depəlet. Kə Herodu əsəŋ di wəyecərə, kə nkən əsəŋ di kərə.

29 Ntə acəpsə a Saŋ Batis ŋane ti mə, kə ŋander ŋələk kəbel kən kə ŋawup.

Yesu ason afum wul kacamat yeri

³⁰ Ko asom nalonkanɛ Yesu kəsək, ko nalomər ko təkō nanayō ko təkō nanatəksɛ mō fəp.

³¹ Ko Yesu oloku ɲa: «Nəder nnō kəsək, nnō kəfo kəyer-yer, nəɲesəm pəpic.» Bawo afum alarəm ɲancder ɲaclukus, ɲanayō fɛ tɛm tedi yeri yati.

³² Ko ɲambɛɛ debil kəkō kəfo kəyer-yer.

³³ Ko afum alarəm ɲanəŋk ɲa nte ɲanckō mō, ko ɲanɛpəl ɲa. Ko afum a sədare səcəsək ɲayɛksɛ sō kəkōgbintərne ɲa.

³⁴ Nte Yesu ontor debil mō, k'ɛnəŋk kənay ka afum alarəm, k'oyɔnɛ ɲa nənɔfər, bawo ɲanayi pəmō ɲkesiya nyɛ yɔntɔyō wəkək mō, k'eyɛfɛ kətəksɛ ɲa mes mɛlarəm.

³⁵ Nte dec dɛncləpɛ mō, ko acɛpsɛ ɔn ɲalɔtərne ɲacloku kō: «Kəfo kanke kəyō yer-yer, dec deyɪ kəlɔp,

³⁶ məloku ɲa ɲakō ɲatɛn yeri, nte tɔɲsɔnɛ ɲakō ɲawayɛnɛ yeri dɛmadare mɛfɛt mɛfɛt, ko sədare səcəsək mō.»

³⁷ Mba ko Yesu oloku ɲa: «Nənasərka nəson ɲa yeri.» Ko acɛpsɛ ɲayɪf kō: «Nte məfan mō səkō səwayɛ afum akanɛ fəp yeri pəsam mpɛ pɛmbəp gbəlɛɲ masar mɛrəɲ mō ba?»

³⁸ Ko Yesu eyɪf ɲa: «Cəcom cəke cō nəyō-ɛ? Nəkō nəmɔmən.» Nte ɲan̄kō ɲamɔmən mō, ko ɲaloku Yesu: «Cəcom kacamat kō lop mɛrəɲ.»

³⁹ Ko Yesu oloku acɛpsɛ ɔn ɲadəs afum cəgba cəgba yika yobuk kəron.

⁴⁰ Ko ɲandəs afum cəgba ca tasar tin (100) kō cəgba ca wəco kacamat (50).

⁴¹ Ko Yesu ɛlɛk cəcom ncɛ kacamat kō lop nyɛ mɛrəɲ, k'eyɛkti fər darenc, k'eyɪf Kanu barka.

K'entepi cəcom k'eyəfə ci kəsənəs acəpsə ɔn, ɲayerəs ci afum. K'eyer sə lop yayəkə afum fəp.

⁴² Kə fəp fəsəm ci kə ɲanəmbərə,

⁴³ k'alukse yeri cəcom kə lop yelpəs cəfala nce wəco kə mərəɲ.

⁴⁴ Arkun aɲe ɲanasəm cəcom cacəkə mə, ɲanabəp arkun wul kəcamət (5.000).

Yesu ɲəkət kəba kəron

⁴⁵ Nte tencepər mə, gbəncana babəkə kə Yesu ɛntarə acəpsə ɔn kəberə debil ɲanunkeɲe kəcali mokuru məkə, ntende Betsayida, nkən pəcgbəcene kəloku kənay ka afum kəluku ndaranan.

⁴⁶ Nte elembərne ɲa mə, k'ɔɲkə kətola Kanu nde tərə kəron.

⁴⁷ Nte dəfəy dəmbəp mə, abil ɲeyi kəba dacə, nkən sona pəyi dəntəf.

⁴⁸ Kə Yesu ɛnəɲk təkə pənacuca acəpsə ɔn kəɲas mə, bawo afef ɲə ɲancgbofne, pibi pəbələ k'ender nnə ɲayi mə pəkət kəba kəron kəkəcepər ɲa.

⁴⁹ Nte acəpsə ɔn ɲanəɲk kə pəkət kəba kəron mə, kə ɲafətə a tubəri tə, kə ɲanəkule-kule,

⁵⁰ bawo fəp faɲan ɲancnəɲk kə, kə kənesə kəyi ɲa. Mba gbəncana babəkə kə Yesu olok-lokər ɲa, pəcloku: «Nəbəkne! In'əfə, ta nənesə!»

⁵¹ Kə Yesu ɛmbərə debil kə afef ɲəsak kəwur. Kə cusu cəwos ɲa.

⁵² Bawo acəpsə ɔn ɲanacərə fə nte o nte teta cəcom, pənasək fə ɲa anə Yesu əfə-ɛ.

Yesu ɛntaməs acuy nde atəfɲa Kenesarət

⁵³ Nte ɲalip kəcali kəba kə acəpsə ɔn mə, kə ɲambəp atəfɲa Kenesarət kə ɲanəkot di abil.

⁵⁴ Nandətor debil k'anəpəl Yesu,

⁵⁵ Kó afum a atóf ñanǝkó fəp ñayekse káder, ñackeré acuy dəsəpoko nnó o nnó ancne a Yesu eyi má.

⁵⁶ Nnó o nnó encberé má, pəyóné tadare kó pəyóné fə ti dare dəpəñ, kó pəyóné fə ti dəkulum, ancbo acuy aban̄ka ñəpəñ, paclətsené Yesu kəwosé acuy ñagbuñené ali dobol da burumus bən. Acuy añé o añé ñancgbuñené di má, ñanctamné.

7

Kətəksə nké atem ñanatəksə má

¹ AFarisi* kó atəksə sariyé s'aSuyif alóma añé ñanader kəyefé Yerusalem má, ñalonkané nde Yesu eyi má, ñakél kó.

² Kó ñanəñk acəpsə a Yesu darəñ akin akin ñacdi yeri ta waca wañan wəsək-é, itó tatəkó ta ñasumpər saliye-é.

³ Awa, aFarisi kó aSuyif fəp ñancdi fə yeri ta ñambikéné waca ñasumpər saliye-é, bawo ñanacəmé mǝyǝ mokur man̄an darəñ.

⁴ Kó ñalukus kəyefé nde aban̄ka ñəpəñ-é, ñancdi fə yeri mənə ñalip kəsumpər saliye, ñanacəmé sǝ mǝyǝ mokur mɛlarəm darəñ, pəmǝ tɛyakəs ta mǝmbəl, mǝndɛ, kó yɛbɛrɛ domun†.

⁵ aFarisi kó atəksə sariyé s'aSuyif ñayif Yesu: «Ta ake tǝ acəpsə am ñandine yeri waca wañan weyik-yik, ta ñasəkəsne saliye, ñacəmé tǝyǝ tokur ta atem darəñ-é?»

⁶ Kó Yesu oloku ña: «Esayi ɛnaloku belbel tetonu cəsayibɛ, nənə aban̄enɛ kəlomp, pəmǝ təkó ancic

* **7:1** *WəFarisi/aFarisi* = Kəgba k'abeki aSuyif añé ñacəpərər ñasektərəné sariyé kó mǝyǝ mokur ma aSuyif má. † **7:4** Yecicəs yokur yǝloma yendenər «kó səcəm», kó pəyóné fə ti-é, «kó kəfənc.»

ti mǝ: «Afum akanɛ dǝcusu gbǝcǝrǝm ɲaɲlelǝs im, mba bǝkǝc yaɲaɲ yǝmbǝl'em pǝpǝɲ.

⁷ Kǝsali nkɛ ɲaɲctolan'em ɲaɲloɲɲ'em mǝ kǝyǝ fɛ dǝkǝcǝmɛ, bawo mosom mmɛ ɲantǝksɛ mǝ, afum ɲapǝr mi, bafǝ Kanu.»

⁸ Nǝsak mosom ma Kanu, nǝcǝmɛ mǝyǝ mokur ma afum darǝɲ.»

⁹ K'oloku ɲa: «Pǝfǝfǝrɛnɛ nu kǝfǝn tosom ta Kanu, nǝccǝmɛ mǝyǝ mokur monu darǝɲ.

¹⁰ Bawo Musa ɛnaloku: «Mǝlelǝs wisi kǝ wiri,» k'oloku sǝ: «Nwɛ oɲlok-lokǝr kas kǝ pǝyǝnɛ fɛ ti kɛrɛ pǝlɛc mǝ, padif wǝkayi.»

¹¹ Mba nǝna nǝɲloku: «Kǝ fum oloku kas kǝ pǝyǝnɛ fɛ ti kɛrɛ-ɛ, paka pǝkǝ pǝmarɲa isɔɲ ǝm kǝmar kam mǝ, isɔɲ pi Kanu,»

¹² ti disrɛ nǝna nǝwosɛ a ta pǝyǝnɛ sǝ kas kǝ kɛrɛ tǝlǝm o tǝlǝm.

¹³ Nǝnimɛ tatǝkǝ toloku ta Kanu mǝyǝ mokur mmɛ nǝnctǝksɛ mǝ. Nǝɲyǝ mes mǝlɛc mǝlarǝm mmɛ mowurɛnɛ mamǝkǝ mǝ.»

Mǝyǝ mmɛ mǝɲsɔɲɛ fum kǝtǝsǝk mǝ

¹⁴ Kǝ Yesu ewe sǝ kǝnay ka afum, k'oloku ɲa: «Nǝcǝɲkǝl im belbel, nǝcǝrɛ sǝ!

¹⁵ Daka o daka deyɛ fɛ todoru ta fum ndɛ dǝmbɛrɛ kǝ disrɛ dǝɲsɔɲɛ kǝ kǝtǝsǝk mǝ. Mba ntɛ tɔɲwur dǝfum mǝ tǝɲsɔɲɛ kǝ kǝtǝsǝk.

¹⁶ Nǝcǝɲkǝl belbel, kǝ tǝyǝnɛ nǝyǝ lǝɲǝs nǝcɲɛ-ɛ.»

¹⁷ Ntɛ Yesu olukus dǝkɛr mǝ, pǝbǝlɛ kǝnay ka afum, kǝ acɛpsɛ ɔɲ ɲayɪf kǝ teta totubcɛnɛ tatǝkǝ.

18 K'eyif ɲa: «Nəna sɔ, nəsɔrɔyi kətɔcərə disrɛ ba? Nəncərə fɛ a daka o daka ndɛ dɛɲyɛfɛ todoru dɛbərə dɛfɛm mɔ, dɔfɔsɔɲɛ kɔ kətɔsɔk?

19 Bawo daka dadɔkɔ dɔfɔbərə kɔ dɛbəkɛc, mba dɔkor dɛmbərə kɔ, kɔ telip-ɛ pɔwɛrɛ di dɔkofi.» Ti disrɛ, Yesu ɛnasɔksɛ alañ ɔn yeri fɛp.

20 K'oloku sɔ: «Ntɛ tɔɲwur dɛfɛm mɔ, tɔɲsɔɲɛ kɔ kətɔsɔk.

21 Bawo dɛbəkɛc mɛcɛm-cɛmnɛ mɛlɛc mɔɲwur: Dowon, deke, kɛdif ka fum,

22 kəsumpər dalakɔ, dɛcɛlɛk, mɛcɛm-cɛmnɛ ma kɔyɔ mes mɛlɛc, cɛmpɛnpɛn, dɛyamayama, kəraca, kɛlɔmɛs ka Mariki, kɛdot banca kɛlɛc dɔtɔɲkulu disrɛ.

23 Mes mɛlɛc mamɔkɔ fɛp dɛfɛm mɔɲwur, mɔcsɔɲɛ kɔ kətɔsɔk.»

Wəran wɛcikərə ɛlaɲ Yesu

24 Kɔ Yesu ɛyɛfɛ dɛndɔ k'ɔɲkɔ atɔf ɲa Tir. K'ɔɲkɔ pɛbərə kɛlɔ kɛlɔma. ɛnafañ fɛ nwɛ o nwɛ pɛcərə ti, mba ɛnatam fɛ kɔyi kɛgbɔpnɛ disrɛ.

25 Wəran wɛlɔma nwɛ ɲɔɲk ɲɛlɛc ɲɛnatɔɲkɛlɛ wan kɔn wəran mɔ, ɛnane gbɛncana babɔkɔ pa-cloku tetɔn, kɔ wəran nwɛ ender pɛtɛmpɛnɛ Yesu wɛcɛk dɛntɔf.

26 Wəran wɛkakɔ wɛKresi ɛnayi, pakom kɔ Siriya Fɛnisiya. K'ontola Yesu a pɛbɛlɛs ɲɔɲk ɲɛlɛc ɲɲɛ ɲɲɛi wan kɔn mɔ.

27 Kɔ Yesu oloku: «Mɔkar kərəsna awut ɲanɛmbərə, bawo pɛntesɛ fɛ kɛlɛkər awut kɛcom mɛlɛmɛ ki cɛn.»

28 Mba kɔ wəran nwɛ oluksɛ Yesu: «Mariki, mɛcɛn amɛsa dɛntɔf mɛɲyi mɛcdi yeri yɛlpɛs ya awut.»

29 Kə Yesu oloku wəran nwe: «Teta toloku tam, məkə, nənjə nələc nəwur wan kam wəran.»

30 Nte wəran nwe emberə ndəron mə, k'embəp wan nwe pəfəntərə dəkəfənc. Nənjə nələc nəwur kə.

Yesu entaməs wərkun nwe enatə kəcne ta oñlok-loku sə mə

31 Kə Yesu eyəfə atəf nə Tir, k'oluksərne ta Sidəñ kəca ka kəba ka Kalile, k'encali atəf nə Sədare Wəco.

32 K'anjkerə kə wətəne nwe enctarpəne kəlok-loku mə, k'alətsəne kə kədənər kə kəca.

33 Kə Yesu ənkekərə wətəne kakə kəsək pəbələ kənay ka afum, k'ember kə tələr dələñəs, k'oyuk lin k'osoptə kə yi tələr dətemer.

34 K'eyekti fər darenc teta kətola Kanu, k'empəne kifir pəpəñ, k'əncəp kusu kəñan: «*Effata!*», ti təyəne «Məğbitə!»

35 Gbəncana babəkə, kə ləñəs yən yəñgbite, kə temer pən pesikələ. K'olok-loku pəcəmpi cəlenj.

36 Kə Yesu oloku nə kətəloku ti ali fum, mba təkə Yesu əncməne nə ti mə, itə nəncdənjə ti.

37 Cusu cənawos afum pəpəñ, nəcloku: «Mes mme əñyə mə fəp mentesə! Əñsəñe atəne kəne, pəsəñe atəlok-loku kəlok-loku!»

8

Yesu əsəñe afum wul məñkələ kənəmbərə

1 Mata maməkə, nte kənay ka afum kələma sə kənətəyə yeri yedi mə, k'ewe acəpsə ən dərəñ, k'oloku nə:

2 «Nənfər deyim teta kənay ka afum kəñkə. Mata maas nəyi kə ina, nəyə fə sə paka o paka pedi.

³ K'isòñe ña kélukus nde ndarañan ta ñandi peri-ε, inñese ta dis dəkələl ña dəpə, bawo aləma pəbòle pə ñayefe.»

⁴ Kò acepse ɔn darəñ ñayif kò: «Awa, deke antam kəsətə cəcom nce andenembərse ña, nnə kəfo kəyer-yer kanke mɔ?»

⁵ Kò Yesu eyif ña: «Cəcom cəke cə nəyɔ-ε?» Kò ñaloku kò: «Cəcom camət-mərəñ.»

⁶ Awa, k'oloku kənay a ñande dəntəf. Nte elək cəcom nce camət-mərəñ mɔ, k'eyif Kanu barka, k'entep-tepi ci, k'eyefe kəsəñəs ci acepse ɔn darəñ nte tɔñsəñe ñayerəs ci kənay k'afum mɔ.

⁷ Molop mələma mənayi sɔ. Nte elip kəyif Kanu barka teta mi mɔ, k'oloku a payer sɔ maməkɔ.

⁸ Kò kənay ka afum kəndi kò kənembərɛ, k'asətə cəfala camət-mərəñ cəlarɛ cəcom cəlpəs.

⁹ Kənay ka afum kanke kənabəp afum wul mankələ (4.000), nte telip mɔ, kò Yesu elembərne ña.

¹⁰ Gbəncana babəkɔ k'embərɛ debil kò acepse ɔn darəñ, kò ñankɔ sədare sa Dalmanuta.

aFarisi ñawer Yesu tɛgbəkərɛ tɛwɛy-wɛy

¹¹ Kò aFarisi ñander, kò ñancop kəgbəkəlɛne kò Yesu, nte ñafan kəsumpər kò dəmoloku mɔ, kò ñawer kò tɛgbəkərɛ tɛwɛy-wɛy tələma nte tementər a Kanu kəsom kò mɔ.

¹² Kò Yesu ontore kifir pəpəñ, k'eyif: «Ta ake tɔ dɛtemp dandɛ dɛñwɛnɛ tɛgbəkərɛ tɛwɛy-wɛy nte tementər a Kanu kəsom im mɔ-ε? Kance icloku nu: Afomentər dɛtemp dandɛ tɛgbəkərɛ nte o nte.»

¹³ Nte elip kəlɔk-lɔkər ña mɔ, kò Yesu ɛsak ña, k'embərɛ sɔ debil kəkɔ ka mokuru.

Lebin da aFarisi kə da Herodu

14 Acəpsə a Yesu darəŋ ɲanapələrnə kələk cəcom. Kəcom kin gboŋ kə ɲanayə dəndo debil.

15 Kə Yesu oloku ɲa tosom ntɛ: «Nəməpi fər, nəkəmbərnə lebin da aFarisi kə da Herodu.»

16 Kə acəpsə ɲayɛfə kəgbəkələnə taŋan, bawo ɲanayə fɛ cəcom.

17 Kə Yesu ɛncərə tes ntɛ ɲancbəcərənə kiti mə, k'eyif ɲa: «Ta ake tə nəmbocərənə kiti nəcloku a nəyə fɛ cəcom-ɛ? Nəntasətə fɛ mera haŋ ndəkəl? Nəfəcərə? Nəna nəmbiyɛ səbomp?

18 Nəyə fər, mba nəfənəŋk? Nəyə ləŋəs, mba nəfəne? Nəncəm-cəmnə fɛ,

19 ntɛ inatɛp-tepɛ arkun wul kəcamət (5.000) cəcom kəcamət mə, cəcom cəlpəs cəfala cəke cə nənasətə-ɛ?» Kə acəpsə ɲaloku Yesu: «Wəco kə mɛrəŋ.»

20 «Ntɛ inatɛp-tepɛ afum wul maŋkələ (4.000) cəcom camət-mɛrəŋ mə, cəfala cəke cə nənasətə cəcom cəlpəs-ɛ?» Kə ɲaloku Yesu: «Cəfala camət-mɛrəŋ.»

21 Kə Yesu eyif ɲa: «Haŋ ndəkəl nəntacərə fɛ ba?»

Yesu ɛntaməs wətənəŋk nde Betsayida

22 Yesu kə acəpsə ɔn ɲander Betsayida. K'anɲərə kə wətənəŋk k'alɛtsənə kə, a pədən kə kəca.

23 Kə Yesu osumpər wətənəŋk wəkakə kəca k'ɛŋkəkərə kə dare kəsək. K'oyukər kə lin dəfər, k'endenər kə waca, pəcyif kə: «Məŋnəŋk paka pələma ba?»

24 Kə wətənəŋk emɛpi fər pəcloku: «Iɲnəŋk afum, iɲnəŋk ɲa pəmə tək, mba ɲaŋkət.»

25 Kə Yesu ɔŋgbəkəre sɔ kəden kə waca dəfər, ntɛ wətənəŋk nwe endegbəkəre kəmeɸi fər pəpəŋ mə, k'entamne, pəcnəŋk pəwanəkəra.

26 Kə Yesu elembərne kə, pəkə nde ndərən, k'oloku kə: «Ta məberɛ dare de!»

Piyer oloku a Yesu ɔyənɛ wəyɛk-yɛk

27 Kə Yesu ɲawur kə acɛpsɛ ɔn darəŋ ntende dare da Sesari sa Filip. ɲayi dɔpɔ, k'eyɛfɛ kəyifət acɛpsɛ ɔn: «Ntɛ afum ɲanlokɔ mə, an'iyənɛ-ɛ?»

28 Kə acɛpsɛ ɲaloku kə: «Alɔma ɲaloku a Aŋnabi Saŋ Batis, kə alɔma a Eli, kə alɔma sɔ a sayibɛ səlɔma.»

29 Kə Yesu eyif ɲa: «Pɛcɛmɛmne ponu, an'iyənɛ-ɛ?» Kə Piyer oloku: «Məna, Krist* məyənɛ.»

30 K'entin-tin ɲa kətɔloku tetən ali fum.

Yesu endəŋk defi dən kə kəfɔtɛ kən

31 Kə Yesu oncop kətəksɛ ɲa pəclenɛ: «Mənɛ patərəs Wan ka Wərkun pəlarəm. Abeki, alonɲɛ apəŋ, kə atəksɛ sariyɛ sa aSuyif ɲandewənəs kə, padif kə, mba pəfɔtɛ afi dacɔ kə tataka ta maas tencepər-ɛ.»

32 Yesu oncloku moloku mame pəsoku pɛs. Kə Piyer ewe Yesu kəsək, k'eyɛfɛ kənal kə.

33 Mba Yesu olukus, k'ɛŋgbətnɛ acɛpsɛ ɔn, k'ɛŋgbəŋ-gbəŋər Piyer: «Məkafəl'em kumunt darəŋ, məna Sentani! Iw'am tewe ta Sentani bawo məfɔcɛm-cɛmne pəmɔ Kanu, mba pəmɔ afum.»

* **8:29** Krist = «Wəsom ka Kanu» tokulɛ tɔ = «Nwɛ Kanu kəyɛk-yɛk kəsom mə teta kəyac afum a Kanu.»

³⁴ Kɔ Yesu ewe kɛnɔy ka afum kɔ aɛɛpsɛ ɔn darɛn, k'oloku nɔ: «Kɔ fum ɛfan kɛɛps'em darɛn-ɛ, wɛkayi pɛsak kɛɛm-ɛɛmnɛ teta nkɛnsɛrka, pɛgbɛnɛ kɛtɔk kɛn kɛpɛmpɛl pɛɛm'em darɛn.

³⁵ Bawo nwɛ o nwɛ ɛnɛɛp kɛyac kɛyi doru kɛn mɔ, kɛndɛsalpɛr kɔ, mba nwɛ o nwɛ kiyi doru kɛn kɛnɛsalpɛr kɔ teta ina kɔ Kibaru Kɛtɛt mɔ, endɛyac ki.

³⁶ Dɛkɛɛmɛ dere dɔ tɔyɔ fum kɛsɔtɔ kɛn doru kɛrkɔr, kiyi kɛn doru kɛsɔlɛr kɔ-ɛ?

³⁷ Ake fum ɛntam kɛsɔn kɛwursɛ ka kiyi kɛn doru-ɛ?

³⁸ Nwɛ o nwɛ ɛlapɛrn'em kɔ moloku mem dɛtɛmp da aciya kɔ asumpɛr dalakɔ dandɛ dacɔ mɔ, Wan ka Wɛrkun sɔ endɛkɔlapɛrnɛ wɛkayi k'endɛder nɔrɔ da Kas disrɛ, kɔ mɛlɛkɛ mɛɛɛmpɛi.»

9

¹ Kɔ Yesu oloku aɛɛpsɛ ɔn sɔ: «Iɛloku nu kance: Afum alɔma nɔyi nnɔ, aɛnɛ nɔntɔdɛfi ta nɔntanɛnk dɛbɛ da Kanu dɛdɛrɛnɛ fɛnɔntɛr-ɛ.»

Kɛtɛnkɛlɛ ka Yesu

² Ntɛ mata camɛt-tin mɛncɛpɛr mɔ, kɔ Yesu ɛlɛk Piyɛr, Sak kɔ Isan k'ɛnɛkɛrɛ nɔ kɛsɛk ndɛ dɛtɔrɔ tɛnɛci, kɔ nɔmbɔkɛrɛ. Kɔ Yesu ɔnkɔ pɛtɛnkɛlɛ fɔr yanɔn kirin.

³ Kɔ yamos yɔn yomot pɛfɛr mpɛ fum o fum ɔntɔtam kɛɛm yi yɛfɛrɛ pɛmɔ tatɔkɔ mɔ.

⁴ Aɛnnabi Eli kɔ Aɛnnabi Musa nɔawurɛr Piyɛr, Sak kɔ Isan, kɔ nɔnɛnk afum akanɛ mɛrɛn nɔɛloɛ-loku kɔ Yesu.

⁵ Kó Piyer oloku: «Watakse, pantesu su káyi nno. Pacambər ngbancan maas: Njin nam, njin ɲa Aɲnabi Eli kó njin ɲa Aɲnabi Musa.»

⁶ Piyer enacəre fe tɔlɔm o tɔlɔm nte ɔɲkɔloku mə, bawo kənesə kənasumpər ɲa pəpəɲ.

⁷ Kó kəp kəɲgbəpər ɲa katəkəp, kó dim dowur kəp kəɲkɔ disre: «Wəkawɛ wan kem nwe imbətər mə ɔfo. Nəcəɲkəl kó!»

⁸ Gbəncana babəkó kó ɲaməmən kəsək, ɲanəɲk fe sɔ fum mənɛ Yesu sona.

⁹ Nte ɲanctor dətərɔ mə, kó Yesu entin-tin ɲa kətɔloku təkó ɲanəɲk mə fum, haɲ Wan ka Wərkun pəcfɔtɛ afi daco.

¹⁰ Kó acəpse aɲɛ maas ɲaməɲkərɛ toloku tatəkó, ɲacyiftɛnɛ taɲan: «Cəke cɔ kəfɔtɛ afi daco kəloku-ɛ?»

¹¹ Kó ɲayif Yesu: «Ta ake tɔ atəkse sariye s'aSuyif ɲaɲloke a mənɛ Aɲnabi Eli pənunɲenɛ kəder kərəsna-ɛ?»

¹² Kó Yesu oloku ɲa: «Eli ender kərəsna kədelompəs mes fəp. Ta ake t'ancice a mənɛ patərəs Wan ka Wərkun pəlarəm, pawənəs kó-ɛ?»

¹³ Mba iloku nu a Eli ender, kó afum ɲayɔ kó təkó ɲafan mə, pəmə təkó Yecicəs Yosoku yoloku tetən mə.»

Yesu entaməs wan nwe ɲəɲk ɲɛlɛc ɲɛnatonɲkulu mə

¹⁴ Nte Yesu, Piyer, Sak kó Isan ɲander ɲabəp acəpse alpəs a Yesu darəɲ mə, kó ɲanəɲk kənay ka afum alarəm kəkəl ɲa, atəkse sariye s'aSuyif ɲacgbəkəlɛnɛ kó ɲa.

¹⁵ Nte kənay ka afum kəndenəɲk Yesu mə, kó cusu cəwos ɲa, kó ɲayɛksərɛnɛ kədeyif kó.

16 Kə Yesu eyif acəpsə ɔn: «Ake nəyi kəgbəkələne kə ɲa-ε?»

17 Kənay ka afum disre kə fum wələma olukse Yesu moloku: «Wətəksə, wan kem inker'am, nwe ɔyɔ ɲɔŋk ɲɲe ɲɲɲamse kə kəlok-loku mə.

18 Kəfo nke o nke encəme ɲɲɲere kə mə, difo ɲɲɲbal kə dəntəf, wan pəwure kəfoc dəkusu, pəcɲaɲərəne sek, pəcyenkerəne. İetsene acəpsə am darəɲ ɲabeləs ɲɔŋk ɲələc ɲaɲe, mba ɲantam fə.»

19 Kə Yesu eyif ɲa: «Dətemp dətəlan, ake təm t'indəsɔyi kə nəna-ε? İcəme nu dəntəf haɲ təm tere-ε? Nəker'em kə.»

20 K'əŋkerə kə wan nwe. Nte ɲɔŋk ɲələc ɲendenəŋk Yesu mə, kə ɲeyikəc wan pəpəɲ, k'entempene dəntəf pəcbəŋkələ, pəcwure kəfoc dəkusu.

21 Kə Yesu eyif wan nwe kas: «Kəyefe ake təm tə tante tenyi kə-ε?» Kə kas oloku Yesu: «Kəyefe pəfete.

22 Təlarəm ɲɔŋk ɲələc ɲaɲe ɲɲɲbal kə dənenc, tələma dəromun nte təɲsəɲe ɲedif kə mə. Mba kə təyənə məntam tələma-ε, məyənə su nənəfər məmar su!»

23 Kə Yesu oloku kə: «Məloku a kə məntam-ε? Antam kəyɔ mes fəp, kə təyənə patəmpər kəlan-ε.»

24 Gbəncana babəkə kə wan kas ɔŋkule pəpəɲ: «İlan! Kəlan kem kəmbut, mba məmar im!»

25 Nte Yesu ənəŋk kənay ka afum kəcyekse kəder mə, k'ɲɲgbəɲ-gbəɲər ɲɔŋk ɲələc pəcloku ɲi: «Məna ɲɔŋk ɲələc ɲətəlok-loku, ɲətəne, in'ɔŋsom əm, məwur wan wəkawe dərɪs, ta məɲere kə sə!»

26 Kə ɲɔŋk ɲələc ɲowur wan wəkawe dərɪs ɲockule-kule pəpəɲ, ɲecyikəc kə pəpəɲ. Kə wan eyi pəmɔ efi, kə afum alarəm ɲaloku a efi.

27 Mba kə Yesu osumpər kə kəca, k'eyekti kə, kə

wan encāmē.

²⁸ Ntē Yesu ŋalukus dēker kō acēpsē ōn mō, kō ŋayēfē kāyifāt kō yōkyōk: «Ta ake tō sēnasērka sēntōnatamē kābēlēs ŋi-ē?»

²⁹ Kō Yesu oloku ŋa: «Dokom da yōŋk yēlēc dandē, kātola Kanu gbēcārēm kēntam kēwūrē yi dāfum.»

Yesu ŋŋgbōkārē sō kādāŋk defī dān kō kāfōtē kēn

³⁰ Ntē Yesu ēyēfē dāndo mō, k'encali Kalile, enafāŋ fē a pacārē ti.

³¹ Encākse acēpsē ōn pācloku ŋa: «Dākāber afum dāwaca Wan ka Wārkun eyi, ŋandedif kō, pāfōtē afi daco kō mata maas mencepār-ē.»

³² Mba toloku tantē tēnasōkār fē acēpsē ōn, ŋacnēsē kāyifāt kō.

An'ēbēk dākacāmē-ē?

³³ Yesu kō acēpsē ōn ŋaŋkō Kaparnam. Ntē ŋambērē dēker mō, kō Yesu ēyēfē kāyifāt ŋa: «Teta ake tō nāndenagbēkālēnēnē dōpō-ē?»

³⁴ Mba acēpsē ōn ŋanaloku fē kō tes o tes, bawo ŋanagbēkālēnē dōpō, kēcārē ka nwe embēk dākacāmē mō.

³⁵ Ti disrē, kō Yesu endē, k'ewe acēpsē ōn aŋē wāco kō mērāŋ, k'oloku ŋa: «Kō fum ēfāŋ kāyōnē wēcōkō-cōkō-ē, wākayi pāyōnē wēdarāŋ ka fāp, pāyōnē sō wāmarēs ka fāp.»

³⁶ Kō Yesu ēlēk wanfēt, k'enēknē kō ŋa daco, k'oloku ŋa:

³⁷ «Nwē o nwē emban wanfēt pāmō wākawē tewē tem mō, emban sō inasērka. Nwē o nwē emban im mō, bafō ina gbēcārēm emban, mba emban sō nwē osom im mō.»

Nwē ōntōtēr su mō, ōmbōtār su

38 Kó Isan̄ oloku kó: «Wə́təksɛ, sənəŋk fūm wəlōma pə́chɛlsɛ yəŋk yɛ́ɛc tɛwɛ tam, kó səsɛp kəmōnɛ kó ti, bawo wəkayi ɛncəmɛ fɛ su darəŋ.»

39 Kó Yesu oluksɛ moloku: «Ta nəmōnɛ kó ti, bawo ali fūm eyi fɛ nwɛ ɛntam kəyōnɛ tɛwɛ tɛm tɛgbəkərə tɛwɛy-wɛy pə́ckəlɪp wəkayi pəloku pələc pɛm mɔ.

40 Ti disrɛ, nwɛ ɔntɔcɛ su mɔ, wəkayi ɛfan̄ su.

41 Nwɛ o nwɛ ɔsəŋ nu domun təmbəl katin teta kəyōnɛ konu aka Krist mɔ, kance icloku nu: Wəkayi ɔ́ɔdekəbut kəsɔtɔ kəway kən kətót.»

Kəbɛŋnɛ kəpəŋ

42 Kó Yesu embɛŋnɛ ŋa ntɛ: «Mba kó fūm ɔsəŋɛ wanfɛt wə́kin kəlɔŋɛ awut akanɛ dacɔ nwɛ ɛŋgbəkər im kəlāŋ kən mɔ-ɛ, kiti ka wəkayi kəyən̄k kətəs təkɔ an̄kotərənɛ kó tasar pə́pəŋ dəkilim paləm kó dəkəba mɔ.

43 Kó kəca kam kəndəsəŋ'am kəciya-ɛ, məgbinti ki! Bawo kəbɛrɛ kiyi kam ka doru o doru məyɔ kəca kin kəncɛpər kələm kam yahanama dənɛnc ndɛ dəntənime mɔ, məyɔ waca mɛrəŋ.

44 *

45 Kó təyōnɛ kəcək kam kəŋsəŋ'am kəciya-ɛ, məgbinti ki. Kəbɛrɛ kiyi kam ka doru o doru məyɔ kəcək kin kəncɛpər kələm kam yahanama məyɔ wɛcək mɛrəŋ.

46 †

47 Kó təyōnɛ dəfər dam dəŋsəŋ'am kəciya-ɛ, məkakti di. Kəbɛrɛ kam akip ŋa dəbɛ da Kanu

* **9:44** Yecicəs yəgbəkərə yələma yendɛŋər: «Yahanama, yet nyɛ yəŋsəm dis mɔ yə́ɔfi, nɛnc ndɛ dəncɔf dis mɔ də́fənime.» † **9:46** Yecicəs yokur yələma yendɛŋər: «Dəndo yet nyɛ yə́səm dis yə́ɔfi, dəndo nɛnc də́fənime haŋ dabada.»

dantaf mayo dafar din kancepar kalam kam yahanama mayo far meran.

⁴⁸ Dando, «yet nye yansom dis ma yofofi, nenc nde dancof dis ma dafanimε.»

⁴⁹ Bawo nwe o nwe andekoyek-yekar ko nenc da kadusum pamo nte anyek-yekar mer daperi ma.

⁵⁰ Mer paka potot po. Mba ko mer mendence-ε, ak'antam kadaktase so mi-ε? Nanyi nenasarka pamo mer, nayinge poforu ko ako.»

10

Yesu katakse kon teta kaceneεε ka anenceεε

¹ Nte Yesu eyefe dando ma, k'onko ataf na Yude ntende mokuru ma kengboko ka Yurden. Ko kanay ka afum alarem kanko so kalonkanε ko kasak. Ko Yesu oncop katakse na, pamo toko oncyo ti ma.

² K'aFarisi nander bawo nanafan kacape ko towul damoloku, ko nayif ko: «Sariye sawose warkun kace waran kon ba?»

³ Ko Yesu oloku na: «Cake co Musa enasom nu-ε?»

⁴ Ko naloku: «Nte Musa enaloku ma, a macic areka necene waran a madewurεεε ko.»

⁵ Ko Yesu oloku na: «Teta bakac yonu yeyenki to Musa enacice tosom tante.

⁶ Mba dakacop da doru ko Kanu kasel na warkun ko waran.

⁷ Ti tosonε nte warkun εnsake kas ko kere, pasektarne waran kon ma,

⁸ afum akanε meran nakafale nayone tesem tin. Ti disre nayone fe so afum meran, mba tesem tin.

⁹ Ta fum pagbey toko Kanu kanabembareneεε ma!»

10 Ntɛ ɲalukus dɛkɛr mɔ, kɔ aɕɛpsɛ ɔn ɲayɛfɛ kɛyifɛt kɔ tɛta moloku mamɔkɔ.

11 Kɔ Yesu oloku ɲa: «Nwɛ enɛ wɛran kɔn pɛkɔ pɛnɛnɛ wɛlɔma mɔ, dɛkɛɕɛmɛ da wɛsumpɛr dalakɔ d'eyinɛ wɛran wɛkakɔ.

12 Kɔ wɛran enɛ wos, wɛrkun wɛlɔma pɛnɛnɛ kɔ-ɛ, nkɔn sɔ dalakɔ d'eyi.»

Yesu kɔ awut

13 Afum ɲanckɛrɛ Yesu awut afɛt ntɛ tɔɲsɔɲɛ pɛɕɕɛɲɛr ɲa waca tɛta kɛtolanɛ ɲa pɛtɔt. Mba kɔ aɕɛpsɛ ɔn ɲaɲgbɔɲ-gbɔɲɛr ɲa.

14 Ntɛ Yesu ɛnɔɲk ti mɔ, kɔ pɛntɛlɛ kɔ, k'oloku ɲa: «Nɛsak awut ɲader nnɔ iyi mɔ, ta nɛyamsɛr ɲa kɛɕɛr, bawo, afum aɲɛ ɲayi pɛmɔ awut afɛt akanɛ mɔ, ɲa ɲayɔ dɛbɛ da Kanu.

15 Kance icloku nu: Nwɛ o nwɛ ɔntɔfaynɛ dɛbɛ da Kanu pɛmɔ wanfɛt mɔ, ɔfɔɕɛkɔbɛrɛ di disrɛ.»

16 Kɔ Yesu ɛlɛk awut k'ɔntɔmpɛr, k'ɛyɛfɛ kɛtolanɛ ɲa pɛtɔt, pɛɕɕɛɲɛr ɲa waca dɛsɔbomp.

Yesu kɔ wɛrkun wɛka daka

17 Ntɛ Yesu osumpɛr dɔpɔ kɛkɔ mɔ, kɔ fum wɛlɔma ɛyɛkɛ k'ɛndɛ pɛɕɛpɛ kɔ suwu pɛɕyif kɔ: «Wɛtɛkɛ wɛtɔt, ɕɛkɛ cɔ pɛmar im kɛyɔ, ntɛ tɔɲsɔɲɛ isɔtɔ kiyi wɛyɛɲ ka doru o doru mɔ-ɛ?»

18 Kɔ Yesu eyif kɔ: «Ta ake tɔ mɛwɛn'em <Wɛtɔt>-ɛ? Ali fum ɔyɔnɛ fɛ wɛtɔt, mɛnɛ Kanu sona gbɔɲ.

19 Mɛncɛrɛ mosom ma Kanu: <Ta mɛɕif fum, ta mɛsumpɛr dalakɔ, ta mɛkiyɛ, ta mɛbanɛ fum sɛɕɛ sa yem, ta mɛɕir fum, mɛlɛlɛs wisi kɔ wiri.»

20 Kɔ fum nwɛ oloku Yesu: «Wɛtɛkɛ, ilɛlɛs mamɔkɔ fɛp kɛyɛfɛ isɔrɔfɛtɛ.»

21 Kɔ Yesu ɔmɔmɛn kɔ, kɔ tetɛn tɔmbɔt kɔ. Kɔ Yesu oloku kɔ: «Tes tin gboŋ tobut ɛm: Mɛkɔ mɛcamɛs daka ndɛ mɔyɔ mɔ fɛp, mɛsɔŋ pɛsam papɔkɔ atɔyɔ daka. Kɔ mɔyɔ ti-ɛ mɛndekɔsɔtɔ daka dɛlarɛm ndɛ dɔKɔm. Kɔ mɛlip-ɛ, mɛdɛr mɛɛps'em darɛŋ.»

22 Kɔ dis dɛndɛncɛ fum nwɛ kɛnɛ toloku ta Yesu, k'owur pɛmɔncnɛ, bawo ɛnayɔ daka dɛlarɛm.

23 Kɔ Yesu ɔmɔmɛn aɛpsɛ ɔn k'oloku ŋa: «Pɛncuca aka daka kɛbɛrɛ ka akip ŋa dɛbɛ da Kanu dɛntɔf!»

24 Kɔ pɛnciyanɛ aɛpsɛ ɔn tɛta moloku mamɔkɔ. Mba kɔ Yesu ɔŋgbɔkɛrɛ sɔ: «Awut em, pɛncuca kɛbɛrɛ akip ŋa dɛbɛ da Kanu dɛntɔf!

25 Pɛfɛfɛrɛnɛ yɔkɔmɛ kɛbɛrɛ abi ŋa tɛsɛmbɛ pɛtas wɛka daka kɛbɛrɛ ka akip ŋa dɛbɛ da Kanu dɛntɔf.»

26 Kɔ toloku tatɔkɔ tɛnanɔkanɛ kɛwosɛs aɛpsɛ ɔn cusu, kɔ ŋayiftɛnɛ: «Awa an'ɛntam ɔŋ kɛfis-ɛ?»

27 Kɔ Yesu ɔmɔmɛn ŋa, k'oloku: «Afum ŋafɔtam ti, mba Kanu kɛntam ti, bawo Kanu kɛntam mɛs fɛp.»

28 Kɔ Piyɛr ɛyɛfɛ kɛloku kɔ: «Sɛna sɛsak ca fɛp ntɛ tɔŋsɔŋɛ sɛncɛm'am darɛŋ mɔ.»

29 Kɔ Yesu oloku kɔ: «Kance icloku nu: Fum eyi fɛ nwɛ ɛsakɛ tɛta ina kɔ Kibaru Kɛtɛt: Kɛlɔ, awɛnc, akirɛ, kɛrɛ, kas, awut kɔ pɛyɔnɛ fɛ ti antɔf-ɛ,

30 wɛkayi ɔŋsɔtɔ tɛm tantɛ ayi mɔ tasar tin ta yayɔkɔ mɛsak mɔ fɛp, kɛyɛfɛ wɔlɔ, awɛnc, akirɛ, cɛrɛ, awut kɔ ntɔf kɛtɔrɛs disrɛ, pɛsɔtɔ sɔ kiyi wɛyɛŋ ka doru o doru tɛm tekiriŋ.

31 Akiriŋ alarɛm ŋandekɔyɔnɛ adarɛŋ, kɔ adarɛŋ ŋayɔnɛ akiriŋ.»

Yesu ɛndɔŋk sɔ tamaas dɛfi dɔn kɔ kɛfɔtɛ kɛn

³² Dəpə ɲanayi kəpə ka Yerusaleṃ, kə Yesu eyi ɲa kirin, bəkəc yənələcə-ləcə acəpsə ɔn, afum akə ɲanacəmə ɲa darəɲ mə, ɲanesə. Kə Yesu elək sə Asom ɔn aɲə wəco kə mərəɲ, k'eyefə kələmər ɲa təkə tendesəto kə mə.

³³ K'oloku ɲa: «Nəcəɲkəl im, Yerusaleṃ ayi kəpə, andekələk Wan ka Wərkun pabər kə alonɲə apəɲ kə atəkse sariyə s'aSuyif dəwaca. Kə ɲanderɲər kə sariyə sa defi, ɲabər kə sə atəyənə aSuyif dəwaca,

³⁴ akakə ɲafani kə, ɲayuksər kə lin, ɲasutə kə tərəɲkən, ɲadif kə. Kə mata maas mencepər-ə, pəfətə afi daco.»

Teyifta Sak kə Isan

³⁵ Kə awut a Sebede aɲə mərəɲ Sak kə Isan ɲander ɲaloku Yesu: «Wətəkse, səfaɲ məyənə su nte səndetol'am mə.»

³⁶ Kə Yesu eyif ɲa: «Cəke cə nəfaɲ a iyənə nu-ə?»

³⁷ Kə ɲalukse Yesu: «Məwosə su wəkin kənd'am kəca kətat kə wəkə kəca kam kəmeriya nde nəro da debeki dam.»

³⁸ Kə Yesu oloku ɲa: «Nəncərə fə nte nəyi kətola mə. Nəntam kəwosə kətərəs pəmə nke ina indesəto mə ba? Nəntam kəcəmə pucuy fər kirin mpə pender kəbəp im mə ba?»

³⁹ Kə ɲaloku: «Səntam ti.» Kə Yesu oloku ɲa: «Awa, nəna sə nəndesəto kətərəs nke indesəto mə, nəsəto sə pucuy pəpəɲ mpə pendebəp im mə.

⁴⁰ Mba nte təyənə kənd'em kəca kətat kə kəca kəmeriya mə, bafə in'əɲsəɲ ki. Afum akə amənke mofə mende maməkə mə, ɲa ɲayə mi.»

⁴¹ Kə pəntelə acəpsə ɔn aɲə wəco nnə Sak kə Isan ɲayi mə.

⁴² Kə Yesu ewe ɲa, k'oloku: «Nəncərə a akə ancərə kətopər dəbə nde tɔf yələma mə, ɲantasərne afum aɲan, səkət sə akirin a tɔf yayəkə ɲaɲkətene kətam afum aɲan kəronj.

⁴³ Mba tatəkə teyi fɛ nnə nənə nəyi mə, nte təyone mə, nwɛ ɛɲfaɲ kəbək dəkəcəmə nu daco mə, pəmar wəkayi pəyone wəbəcə konu,

⁴⁴ nwɛ o nwɛ ɛɲfaɲ kəyone wəkirin nu daco mə, pəmar pəyone wəcar ka fəp.

⁴⁵ Wan ka Wərkun ender fɛ padəcə kə, mba ender kəcəbəcə afum pəsən sə kiya kən wəyən pəwurus kənay ka afum.»

Yesu entaməs wətonəɲk

⁴⁶ Kə ɲander Yeriko. Nte Yesu ɛncyɛfɛ Yeriko ɲasol kə acəpse ɔn darən kə kənay ka afum alarəm mə, kə wətola wətonəɲk wələma, Bartime wan ka Time pənde dɔpə kəsək.

⁴⁷ Kə Bartime ene a Yesu wəka Nasaret ɔfə, k'ɛyɛfɛ kəkule-kule: «Wan ka Dawuda, Yesu, məyon'em nənəfər!»

⁴⁸ K'afum alarəm ɲaɲgbəɲ-gbəɲər kə a pəcaɲk, mba pəcnaɲkanɛ kəkule-kule: «Wan ka Dawuda, məyon'em nənəfər!»

⁴⁹ Kə Yesu ɛncəmə k'oloku: «Nəwe kə.» Kə ɲawe wətonəɲk ɲacloku kə: «Məbəkne, məyɛfɛ, ɛw'am.»

⁵⁰ Kə wətonəɲk ɛləm duma dəkəronj, k'oyokne kəyɛfɛ, k'ɔɲkə nde Yesu eyi mə.

⁵¹ Kə Yesu eyif kə: «Cəke cə məfaɲ a iyən'am-ɛ?» Kə wətonəɲk oloku: «Wətəkse, iluksərne sə kənəɲk!»

⁵² Kə Yesu oloku kə: «Məkə, kəlaɲ kam kəntaməs əm.» Gbəncana babəkə, k'oluksərne sə kənəɲk, k'encəmə Yesu darən.

11

Yesu embere Yerusalem

¹ Nte Yesu kə aɕɛpsɛ ɔn darəŋ ɲalɔtərne Yerusalem mə, pəsərɔyi kəca ka Bətfase kə Betani ntende tərɔ ta Tək ya Olif kəsək, k'osom aɕɛpsɛ ɔn darəŋ mɛrəŋ,

² pəcloku ɲa: «Nəkɔ nde dare dandɛ nantɛfərne mə, kə nəndena kəɕbɛɛ di-ɛ, nənəkɔbəp di sɔfale sɛfɛt nɛ fum o fum ɛntatəndɛ kərəsna kəron mə. Nəsikəli si, nəker'em.

³ Kə tɔyɔnɛ fum pəyif nu: «Ta ake tɔ nənɔyɔnɛ ti-ɛ?» Nəloku kə: «Bawo Mariki ɛfan si. K'elip-ɛ, ɔŋkɔ ndɛkəl lukɛ si nnɔ.»»

⁴ K'aɕɛpsɛ a Yesu darəŋ aɲɛ ɲanɔkɔ, kə ɲambəp sɔfale sɛfɛt nɛ pakot si dabanɔka kumba kəsək dɔpɔ, kə ɲasikəli si.

⁵ Afum alɔma aɲɛ ɲanayi dənda mə ɲayif ɲa: «Cəke cɔ nəyi kəyɔ-ɛ? Ta ake tɔ nənɔsikələ sɔfale sasəkɔ-ɛ?»

⁶ Kə ɲaloku təkɔ Yesu ɛnaloku ɲa mə, k'akakɔ ɲawosɛ ɲa kəsikəli si.

⁷ Kə ɲanɔkenɛ Yesu sɔfale nɛ, kə ɲadenɔsər si suma sənjan sakəron, kə Yesu ɛndɛ si kəron.

⁸ K'afum alarəm ɲamper-pere kə suma sənjan sakəron dɔpɔ, kə alɔma ɲamboɕɛ kə bat dɔpɔ nyɛ ɲanacɛp dəkulum mə.

⁹ Afum akɔ ɲanɔkɔt kə tekirin, kə akɔ ɲanacəmə kə darəŋ mə ɲackulɛ-kulɛ:

«Hosana! * Kanu kəpɔɕɛ pətət nwe ɛnderɛnɛ tewe ta Mariki mə!

¹⁰ Kanu kəpɔɕɛ pətət dɛbɛ da kas kosu Dawuda ndɛ deyɪ kəder mə!

* **11:9 Hosana** = toloku ta kusu ka Arame tɔ, it'oloku «O Mariki, məyac su!» **11:9** Yabura 118.25-26

Hosana pələl peyi Kanu nke kəyi dəKəm mə!»

¹¹ K'embere Yerusalem nde kələ kəpən ka Kanu. Nte elip kəməməən cəsək cən mə, kə pibi pender, Yesu kə acəpse ən wəco kə merən ηawur kə ηanjə Betani.

Yesu ontolane kətək pələc

¹² Dəckəsək nte ηacwur Betani mə, dor dənayə Yesu.

¹³ K'ənənk pəbələ kətək ka yokom ya fik kəkumptər bəpər, k'ənkə kəməməən kə pəyəne a ənsətər ki pedi-ε, mba nte embəp ki mə, ənənənk fε pokom o pokom mənε bəpər, bawo bafə tēm tokom ta fik tənayi.

¹⁴ Kə Yesu oloku kətək: «Ta fum o fum pədi sə yokom ya məna!» Kə acəpse ən darən ηane ti.

Yesu nde kələ kəpən ka Kanu

¹⁵ Kə ηanjə Yerusalem. Nte Yesu embere kələ kəpən ka Kanu mə, k'eyεfε kəbeləs acaməs fəp kə akə ηancway dəndo kələ kəpən mə. K'εηgbaləs məsa ya asəkpər pəsəm kə səcəm sa acaməs ntantoriya,

¹⁶ ənawosε fε nwε o nwε kəsare-sare ca pəcəpərəne dəndo kələ kəpən disre.

¹⁷ Kə Yesu εntəksε ηa pəcloku: «Bafə Kanu kəloku dəYecicəs: «Andewe kələ kem dəkətola Kanu da afum a təf ya doru fəp.» Mba nəna nəηkafəli ki təgbəkεne ta calbante.»

¹⁸ Alonε apən kə atəksε sariye s'aSuyif ηane kə dim, kə ηanten təkə ηantam kədif kə mə. Nancnese kə, bawo cusu cənawos afum fəp teta mətəksε mən.

¹⁹ Nte dəfəy dəmbəp mə, Yesu kə acəpse ən darən ηawur dare.

Yesu kə kətat kəwosərəne

²⁰ Bətbət, ntə ηayi kəcepər mə, kə acəpsə ʔn darəη
ηanəηk kətat ka fik kəwosərəne ηaη ntəntəl.

²¹ Kə Piyer encəm-cəmne təkə tənacepər mə,
k'oloku Yesu: «Wətakse, məməməən kətat ka fik nkə
mənatolane pələc mə, kəwosərəne.»

²² Kə Yesu oloku ηa: «Nəgbəkər kəlaη konu Kanu.

²³ Kance icloku nu: Nwə ʔηloku tərə tante:
«Məyefə nnə məkə mələmnə dəkəba,» kə
məntənesər-nesər dəbəkəc, mba məlaη a təkə
məloku mə tenyi-ε, aηyən'am ti.

²⁴ It'əsəη ntə iloku nu: Ntə o ntə tə nəloku kətola
Kanu disrə mə, nəlaη a nəηsətə ti, aηyənə nu ti.

²⁵ Kə təyənə nəndetola, pəyənə nəməηkə fum
mətələ-ε, nəηaηnənə kə, ntə təηsəη Kas konu nkə
kəyi nde dəKəm mə, kəηaηnənə sə nəna pələc ponu.

²⁶ [†]

Deke dəbe da Yesu dəηyefε-ε?

²⁷ Kə Yesu ηalukus Yerusalem kə acəpsə ʔn, ntə
ηanckət nde kələ kəpəη ka Kanu mə, aləηnə apəη,
atəkse sariyε s'aSuyif kə abeki a dətəf ηander ηabəp
Yesu

²⁸ kədeyif kə: «Kətam kərə kə məηyənə mame-ε?
An'əsəη əm kətam nkə məηyənə mes mame mə-ε?»

²⁹ Kə Yesu oloku ηa: «Teyif tin gboη t'indeyif
nu, nəluks'em ti, ina sə iloku nu kətam nkə inyənə
mame mə.

³⁰ Kəgbət dəromun ka Saη dəkəm kəncyefε ba, ka
nda afum? Nəluks'em toloku.»

† **11:26** Yecicəs yokur yələma yendəηər moloku mame: «Mba
kə nəna nəntəηaηnənə akə-ε, Papa konu nwə eyi nde dəkəm mə
əfəηaηnənə sə nəna kəciya konu.»

³¹ Mba kɔ ɲayɛfɛ kɛgbɛkɛlɛnɛ tanɲan: «Kɔ sɛlukɛ ndɛkɛl a dɛkɔm kɛgbɛt kɔn kɛnayɛfɛ-ɛ, ɛɲyif su: <Ta ake tɔ nɛnatɔlanɛ Saɲ-ɛ?»

³² Kɔ sɛloku a nda afum kɛncyɛfɛ-ɛ, apayo! Pɛyɔ wɛyɔwɛy dɛnda!» ɲancnɛsɛ kɛnay ka afum, bawo fɛp fɛnacɛrɛ a Saɲ sayibɛ yati s'ɛnayɔnɛ.

³³ Kɔ ɲalukɛ Yesu moloku: «Sɛncɛrɛ fɛ.» Kɔ Yesu nkɔn oloku ɲa sɔ: «Ina sɔ, ifɔloku nu kɛtam nkɛ ɲɲyɔnɛ mamɛ mɔ.»

12

Totubcɛnɛ ta abɛc ɲgbɔɲkɛlɔ ya wɛn alɛc

¹ Kɔ Yesu ɛyɛfɛ kɛlok-lokɛr ɲa dɛtotubcɛnɛ: «Fum wɛlɔma ɛnabɔf ɲgbɔɲkɛlɔ ya wɛn. Kɔ fum nwɛ ɔsɔnɛ yi saɲka han ɲ'ɔnɔɲkɛr, k'ɛɲkay dɛkɛfɔcɛs da wi, k'ɛncɛmbɛr tetek tobumɛ. Ntɛ elip mɔ, k'ɔsɔɲ yɛbɛc ya abɔf ɲa ɲgbɔɲkɛlɔ ya wɛn yayɔkɔ afum alɔma, ɲatɔɲɲɛ kɔ akakɔ kɛcsɔɲ kɔ kɛway, kɔ nkɔn owur k'ɔɲkɔ marɛnt.

² Ntɛ tɛm tepim tɛmbɛp mɔ, kɔ fum nwɛ osom wɛcar nda abɔf a ɲgbɔɲkɛlɔ ya wɛn, kɛkɔban yokom ya wɛn yɔkɔ pɛmar pasɔɲ kɔ kɛway kɔn mɔ.

³ Kɔ abɛc a ɲgbɔɲkɛlɔ ya wɛn ɲasumpɛr kɔ, kɔ ɲasut, kɔ ɲasak, k'olukus waca wɔsɔkɛr.

⁴ Kɔ wɛka ɲgbɔɲkɛlɔ nwɛ osom sɔ wɛcar wɛlɔma, kɔ abɛc a ɲgbɔɲkɛlɔ ya wɛn aɲɛ ɲasut sɔ wɛkakɔ domp, kɔ ɲalapɛs kɔ dɛmɔlɔmɛs.

⁵ Kɔ mariki mɛmɛ mɔɲgbɔkɛrɛ sɔ kɛsom wɛlɔma, kɔ abɔf aɲɛ ɲasumpɛr wɛkakɔ kɔ ɲandif. Abɛc akanɲɛ ɲanasut alarɛm, ɲacdif alarɛm.

⁶ Wan kən nwe əmbətar mə, sona s'ənacəmə kə oŋ. K'osom wəlpəs wəkakə nnə ŋayi mə, pəcloku: «Ŋaŋkəleləs wəkawə, wan kem əfə!»

⁷ Kə abəc a ŋgbəŋkələ ya wən aŋə ŋalokənə: «Wələk kən kə əfə, wəkawə! Nəder, padif kə, kə kəndeyənə kosu.»

⁸ Kə ŋasumpər kə, kə ŋandif, kə ŋaŋbal kəbel kən saŋka tadarəŋ.»

⁹ Kə Yesu eyif ŋa: «Cəke cə wəka ŋgbəŋkələ endeyə-ə? Wəka ŋgbəŋkələ ender pədifət abəc akakə, pələk abəc aləma, pəsəŋ ŋa yəbəc ya ŋgbəŋkələ yən.

¹⁰ Nənakaraŋ fə Yecicəs Yosoku yayə ba?: «Togbu mpə acəmbər kələ ŋanace mə, pənader pəyənə oŋ togbu pətat, pa dacə.

¹¹ DəMariki təyefə, tes tə nte tenciyanə su dəfər mə.»»

¹² Kə akiriŋ aSuyif ŋafaŋ kəsumpər Yesu, mba kə ŋanese kənay ka afum. Ŋanacərə a tetanə tə Yesu ənalokənə totubcənə tatəkə. Kə ŋasak Yesu, kə ŋaŋkə.

Akiriŋ aSuyif ŋafaŋ kəcəpə Yesu towul

¹³ Kə akiriŋ aSuyif ŋasom nnə Yesu eyi mə aFarisi kə afum a Herodu aləma, nte təŋsəŋə ŋacəpə Yesu towul, ŋasumpər kə dəmoloku mə.

¹⁴ Kə akakə ŋander ŋaloku kə: «Wətəksə, səncərə a məlomp, məfənesə kələsər tewe, məfəkiti fum tənəŋk tən, dəpə da Kanu yati də məntəksə afum dəkance. Awa, sariyə səwosə su kəsəŋ Sesar* wəbə wəka təf ya Rom dut ba, ka ta səsəŋ kə di?»

12:11 Yabura 118.22-23 * **12:14** Sesar tewe tə, nte anasəŋ nwe o nwe ətəmpər dəbə da təf ya Rom mə.

15 Nte Yesu enacərə na kəyənə abanənə kəloomp mə, k'olukse na: «Ta ake tō nəŋwakəs em-ε? Nəker'em gbəlen bin ba pəsam, ider iməmən.»

16 Kə ŋan̄kərə kə gbəlen bin. K'eyif na: «Alulu na ana ŋə ŋan̄ε kə yecicəs yayε-ε?» Kə afum an̄ε ŋaloku: «Ya Sesar wəbε wəka Rom yə.»

17 Kə Yesu oloku na: «Awa, nəson̄ Sesar pəkə pəyənə pən mə, kə Kanu sə pəkə pəyənə pən mə.» Kə cusu cəwos na pəpən̄ tetən.

Teyifta kəfəte afi daco

18 K'aSadisi[†] an̄ε ŋaloku a fum əfəyεfε defī mə, ŋander ŋayif Yesu:

19 «Wətəkse, nte tō Musa enacice su: «Kə fum efi ta əyə wan, mba pəsak wəran-ε, pəmar wənc ka wəfi pələk wəcəbokəra wəkakə pənence, pəsən̄ wənc wəfi yuruya.»

20 Awənc an̄a camət-mərən̄ ŋanayi. Kə wəcəkə-cəkə enence, k'efi esak fε yuruya.

21 Kə wəka mərən̄ enence, nkən̄ sə k'efi esak fε yuruya. Itə pənayi wənc wəka maas,

22 ali wəkin awənc an̄a akan̄ε camət-mərən̄ enasak fε yuruya. Nte ŋalip kəfis-fis mə, kə wəran sə efi.

23 Ti disrε, kə dəsək dəyεfε da afi dendebeṗ, an'endeyə wəran-ε? Bawo afum akan̄ε camət-mərən̄ ŋananence kə!»

24 Kə Yesu oloku na: «Nənəŋk it'əsən̄ε nte nənciyanə mə. Nəncərə fε Yecicəs Yosoku, nəncərə fε sə fənəntər fa Kanu.

[†] 12:18 ASadisi = kəgba ka afum aSuyif an̄ε ŋancəm-cəmne a kəyεfε defī kəyi fε, mələkə meyi fε, yəŋk kə arkifin yeyi fε mə. Məmən̄ sə Asom 23.8

25 K'afi ɲandefɔtɛ aɸi daco-ɛ, ɲafɔde ɲacɲɛncɛnɛ, ɲandeyi pəmɔ mɛlɛkɛ mmɛ meyi Kanu kəsək mɔ.

26 Kəcloku a fum endefɔtɛ aɸi daco, nənkarəɲ fɛ buk ba Musa ba? Ntɛ Kanu kənaloku Musa nde dɛrəntəm mɔ: «In'ɔyɔnɛ Kanu ka Abraham, Kanu ka Siyaka, Kanu ka Yakuba!»

27 Bafɔ Kanu ka aɸi k'ɔyɔnɛ, mba ka ayi wəyɛɲ. Nəna nəsolnɛ fɛ kance!»

Tosom təkɔ telelɛ tɛtas mosom fəp mɔ

28 Kɔ wətəkɛ sariyɛ s'aSuyif wəlɔma, nwɛ ɛnane ɲa sim ɲacgbɛkəlɛnɛ mɔ, ɛnənɲk a Yesu olɔk-lɔkər ɲa belbel, k'ender pəcyif Yesu: «Tosom tere tɛbɛk dəkɛcəmɛ mosom fəp daco-ɛ?»

29 Kɔ Yesu olɔku kɔ: «Tosom tayi tɔyɔnɛ: «Məcənɲəl Yisrayel! Mariki, Kanu kosu sona gbɔɲ s'ɔyɔnɛ Mariki.

30 Məbətərɛ Mariki Kanu kam abəkɛc ɲam fəp, afəkəl ɲam fəp, mɛcɛmɛmɛnɛ mam kɔ səkət sam fəp.»

31 Tɔcɔnc ta ti tɔyɔnɛ: «Məbətər wɛnc əm pəmɔ təkɔ məmbətərɛnɛ mɔ.» Tosom təlɔma teyi fɛ ntɛ tɛmbɛk tɛtas mamɛ mɛrəɲ mɔ.»

32 Kɔ wətəkɛ sariyɛ nwɛ olɔku kɔ: «Tentesɛ, Wətəkɛ, məloku ti kance disrɛ: A Mariki sona sən gbɔɲ s'ɔyɔnɛ Kanu, a wəlɔma eyi fɛ kɔ pəntɔyɔnɛ nkən-ɛ,

33 məbətər kɔ abəkɛc ɲam fəp, kɔ dosoku domp dam fəp, kɔ səkət sam fəp, məbətər wɛnc əm pəmɔ təkɔ məmbətərɛnɛ mɔ. Mosom maməkɔ mɔyɔ dəkɛcəmɛ mɛtas yɔcəl nyɛ ancɔfɛ Mariki mɔ kɔ yolonɲɛ yəlɔma fəp.»

³⁴ Nte Yesu ənəŋk a wətakse sariye wəkawε oloku təkə pəmar mə, kə Yesu oloku kə: «Məmbəle fε kəbεre akip ɲa dεbe da Kanu dəntəf.» Ali fum ənabəkne fε sə kəyifət kə toloku təloma.

Krist kə Dawuda

³⁵ Yesu pətakse nde kələ kəpəŋ ka Kanu: «Cəke cə atakse sariye s'aSuyif ɲantam kəloku a Krist‡ wan ka Dawuda gbəcərəm ɔfo-ε?

³⁶ Amera Nəcempi ɲenasəŋe nkən Dawuda yati kəloku nte: «Mariki Kanu oloku Mariki mem: «Məder mənd'em nnə kəca kem kətot haŋ iclip kəboc aterεne am wεcək wam dəntəf.»»

³⁷ Nkən Dawuda yati ewe wəsom wəka Kanu «Mariki», cəke cə Mariki εntam kəyəne wan ka Dawuda-ε?» Kənay ka afum alarəm kəncəŋkəl Yesu pəbotu disre.

Yesu oloku kənay ka afum kəkembərne ka atakse sariye

³⁸ Yesu oncloku kənay ka afum dəmetakse mən: «Nəkembərne atakse sariye s'aSuyif, ɲambətar kəcacεne suma səpəŋ, pacyif ɲa kəyif kələl mofo mme ambəpsεne mə,

³⁹ pacsəŋ ɲa səcəm səkirin sa dəkətola Kanu da aSuyif, pacsəŋ ɲa dəkənde d'abε mofo medi yeri dəcəsata.

⁴⁰ Nəcbaŋsər acəbokəra daka daŋan, ɲacbəlse sali nte təŋsəŋe pagbəkəre ɲa mə. Andekəkiti ɲa kiti kəyənki.»

Kəpocε ka wəcəbokəra wətəyo daka

‡ 12:35 Krist = Wəbe nwe Kanu kəyek-yek mə, Wəyek-yek ka Kanu

12:36 Yabura 110.1

⁴¹ Dāndo kēlo kēpōŋ ka Kanu, Yesu pānde pātefārne kan̄kēra, pāgbātne nte kēnay ka afum kēmbēr ki pāsam mō. Aka daka alarām ŋancber ki pāsam pēlarām.

⁴² Kō wēcābokēra wētōyo daka wēlōma ender pāboc fārēŋk mērēŋ nfe fānapice dākēcāme mō.

⁴³ Kō Yesu ewe acēpsē ōn darēŋ k'oloku ŋa: «Kance icloku nu: Wēcābokēra wētōyo daka wēkawē om-pocē pātas akō fēp aŋe ŋamboc pāsam kan̄kēra disre mō.

⁴⁴ Bawo, pecerne paŋan pō akō fēp ŋamboc, mba nkōn, kētōyo kōn daka disre omboc pōkō ōyo gbēcārām pedi mō.»

13

Yesu oloku a andelāsār kēlo kēpōŋ ka Kanu

¹ Nte Yesu owur kēlo kēpōŋ ka Kanu disre mō, kō wēcēpsē kōn darēŋ wēkin oloku kō: «Wētākse, mēmōmōn masar mēpat mōtōt, mēmōmōn wēlo wēpōŋ wa kēlo kēpōŋ ka Kanu!»

² Kō Yesu oloku kō: «Mēŋnēŋk wēlo wēpōŋ wawē! Tasar pōfōdeden̄sē tasar kēron̄ nno, mpe antōdewuŋ mō.»

Pālēc kō kētārās

³ Nte Yesu endē nde tōrō ta Tōk ya Olif pātefārne kēlo kēpōŋ ka Kanu mō, Piyēr, Sak, Isan̄ kō Andāre ŋayefe kēyifāt kō ŋabōkārē:

⁴ «Mēloku su ake tēm tō tatōkō tendeyi-ε? Tēgbēkārē tere tendementār kēlarē ka mes mame mēloku mō fēp-ε?»

⁵ Kō Yesu eyefe kēloku ŋa: «Nākēmbārne ta fum o fum pēsōŋe nu kēsōlē!

⁶ Afum alarəm ηandeder ηacbaηene kəbəcə tewe tem, ηacloku nu: «In'əfə, wəsom wəka Kanu!» Nədetalər kənay ka afum alarəm.

⁷ Kə nəndene pacloku teta kəwan kə pəyone fe ti, pacfor teta ki-ε, ta nənese! Mene mes maməkə meyi, mba təfədeyone kəresna kəlip ka doru de.

⁸ Bawo afum a atəf ηələma ηandeyefərene kə afum a atəf ηocuru, dəbe dəyefərene kə dəbe. Antəf kəyikce kə dor yendeyi mofo mēlarəm. Maməkə fəp mendeyi pəmə kəcop ka pucuy pa dokombəra.

⁹ Nəkembərne nənasərka ntə tentam kəbəp nu mə. Andekekəre nu dəηkiti d'aSuyif, andesut nu dəkətola Kanu da aSuyif dəlarəm. Nəndeloku təkə nəncəre tetem mə akirin a sədare səpəη kə abε a təf ələma fər kirin.

¹⁰ Mene padəηkər kəresna Kibaru Kətət afum a təf ya doru fəp.

¹¹ K'andekəkəre nu kəkəber ηa dəwaca-ε, ta nənese təkə nəηkəloku mə, mba nəloku təkə aηkəsəη nu gbəncana babəkə mə, bawo bafə nən'endekəlok-loku, mba Amera Nəcempi ηa Kanu.

¹² Wenc wendekəsəη wenc padif. Tatəkə tə kas kəndekəsəyə wan kən. Awut ηandekəcəme akombəra aηan dəbəkəc, ηasəη ηa padif.

¹³ Fəp fəndeter nu teta tewe tem, mba nwe endebəkne ti haη mes maməkə melip mə, Kanu kəndeyac kə.»

Pəyikyik pələsar pəpəη mpe Mariki enter mə

¹⁴ «Kə nəndenəηk pəyikyik pələsar pəpəη mpe Mariki enter mə, pənde nnə pəntəmar pi kəyi mə, a afum akə ηandeyi Yude mə pəmar ηayekse ηape

məro kəron. Pəmar wəkarəŋ ka buk bambə pəcərə tante!

¹⁵ Nwə enyi daban̄ka mə, ta pəbərə kəlo kən disrə kəkələk paka.

¹⁶ Nwə enyi dalə mə, ta pəlukus nde ndəron kəkələk duma dən.

¹⁷ Pucuy pere pə tendeyənə abəkəs, kə aŋe ŋande ŋacmesər dəsək dadəkə mə!

¹⁸ Nətola Kanu ta pucuy papəkə peder dərəŋ.

¹⁹ Bawo mataka maməkə mən̄yənə mataka ma kətrəs, nkə kəntəyə kəwurenə kəyefə ntə Kanu kəlompəs doru mə haŋ ndəkəl, fum o fum afəsətrəs pəmə tatəkə.

²⁰ Mba Mariki Kanu pənətabelər mataka maməkə-ε, k'ali fum əfədekəfis. Mba ənabelər mataka maməkə teta aŋe ənayək-yək mə.

²¹ Kə fum wəloma oloku nu: «Məməmən: Krist eyi nnə,» «Məməmən: Eyi nde,» ta nəlaŋ wəkayi.

²² Bawo aban̄enə kəyənə Krist kə sayibə sa yem ŋandewur doru. Nəde ŋacyə megbəkərə kə mes mēwēy-wēy ntə tən̄səŋe, kə təyənə ŋactam-ε, ŋatalər akə Kanu kənayək-yək mə.

²³ Nəkembərne belbel, iloku nu mes mamə ta məntabəp-ε!»

Kəder ka Wan ka Wərkun

²⁴ «Mba mataka maməkə, kə pucuy papəkə pen-cepər-ε, pəndeyə gbərəp, ŋof ŋəfədesəmar,

²⁵ cəs cəndetəmpənə kəyefə dəkəm, fənəntər fa kəm fəndeyikcə.

²⁶ Awa, andənəŋk Wan ka Wərkun pəcder dəkəp kə fənəntər fəlarəm kə nərə da debeki dən.

²⁷ Endesom melekə ən dəməmpəmpə ma doru fəp kəlonka ka anje enayek-yek mə dəmonjkubut manjkələ ma dəKəm kə antəf.»

Kətəksə nkə kətək ka fik kəsəŋ mə

²⁸ «Nətəkəs totubcənə nte kətək ka fik kəmentər mə: Kə wara wa ki wəcanjk wələŋk-ε, nəcərə a kətən kəlötərnə.

²⁹ Nəna sə, kə nəndenəŋk mes maməkə mecdər-ε, nəcərə a Wan ka Wərkun əlötərnə yati.

³⁰ Kance icloku nu: Dətemp dandə dəfəcepər ta mes mamə fəp meyi-ε.

³¹ Kəm kə antəf yendesələ, mba moloku mem məfədesələ.»

Fum o fum əfəcərə tēm nte Mariki endeder mə

³² «Nte təyənə ta dəsək, kə pəyənə fə ti, ta tēm nte doru dendelip mə, fum o fum əncərə fə ti, ali melekə mmə meyi dəkəm mə fəp, ali wan, mənə Papa sona gboŋ εcərə ti.

³³ Nəkəmbərnə, ta nədəŋəs, bawo nəncərə fə tēm nte tendeyi mə.

³⁴ Pəndeyi pəmə nte wərkun endekə marənt, pəsək kələ kən, pəsəŋ acar ən nwe o nwe yəbəc yən, pəsom wəbum kəkəmbərnə kumba.

³⁵ Nəna sə nəkəmbərnə, bawo nəncərə fə tēm nte wəka kələ endeder mə: Təntam kəyənə dəfana, cəkcekana, dəsəkana kə pəyənə fə ti-ε bətbətana.

³⁶ Ta pəder pəbəp nu nəcdirə.

³⁷ Təntə inloku nu mə, inloku ti fəp, nəkəmbərnə!»

14

Abə ŋasekə Yesu tənəkəndəm

¹ Cəsata ca Kəcəpər ka Məleke medif kə ka Cəcom cətonəjkəl lebin pəmar cəyi kə mata mərənj men-cepər-ε. Alojnε apənj kə atəksε sariye s'aSuyif njancten kəsumpər Yesu cəpənpən disrε, ɲadif kə.

² Bawo ɲancloku a ta pasumpər kə dəsək da kəsata, ta tedesənjε pəyamayama pedeyi afum daco.

Wəran osop Yesu labundε dəromp

³ Ntε Yesu εnayi Betani mə, ndena Simənj wəcunε sen, kə wəran wələma embere tətəjnε ɲacdi yeri. Wəran nwε pətəmpər təkəbə pa alabatər* pələre labundε da nar tεp, labundε deyenki kəway. K'osuncu təkəbə mpε, k'olonşər labundε ndε fəp Yesu dəromp.

⁴ Kə pəntεle afum aləma, kə ɲayifnε: «Ta ake tə eləsəre-ləsəre labundε dandε-ε?

⁵ Anatam di kəcəməs ɲənj pəsam gbələnj masar maas, pasənj pi atəyə daka.» Kə pəntεle ɲa nnə wəran nwε eyi mə.

⁶ Mba kə Yesu oloku: «Nəcə kə! Ta ake tə nəcəməne kə darənj-ε? Təyə tətət t'əyə nnə ina iyi mə.

⁷ Atəyə daka, ɲayi nu daco tēm fəp, nəntam kəyənε ɲa pətət tēm ntε o ntε nənfənj mə. Mba ina, nəfədey'em tēm fəp.

⁸ Ƴə təkə entam mə. Onunjkεnε kəsop im labundε kəlompəs ka kəbel kem a pacwup ki.

⁹ Kance icloku nu: Nnə o nnə andedənjk Kibaru Kətat doru dandε kərkər mə, anlokə sə təyə tətət ta wəran wəkawε kəcēm-cēməs ka doru.»

Yudas εfənj kəsənj Yesu abε a alojnε

* **14:3** *Təkəbə pa alabatər* = Təkəbə mpε anclompse tasar pefer pεpat. Anjwe tasar pətət mpε «alabatər».

¹⁰ Yudas wāka dare da Keriyot, nwe enayi acepse a Yesu darəŋ aŋe wəco kə mērəŋ daco mə, ŋkə pəbəp abe a alonŋe, nte tənŋəŋe pəber Yesu ŋa dəwaca mə.

¹¹ Nte alonŋe ŋancəŋkəl moloku mən mə, kə pəmbət ŋa, kə ŋaloku kəsəŋ kə pəsam. Yudas pəctən tɔyɔ nte endekəber Yesu ŋa dəwaca mə.

Yesu eyi kadi yeri ya Pak kə acepse ɔn darəŋ

¹² Dəsək dəcəkə-cəkə da kəsata ka Cəcom cətonəŋkəl lebin, dəsək nde anclonŋe ŋkesiya ya Kəcepər ka Mələkə medif mə, kə acepse a Yesu darəŋ ŋayif kə: «Deke məfan səkolomps'am yeri ya kəsata ka Kəcepər ka Mələkə medif-ε?»

¹³ Kə Yesu osom acepse ɔn darəŋ mērəŋ, k'oloku ŋa: «Nəkə dare, nəŋkənəŋk wərkun pəsare apampe ŋa domun pader, kədefayne nu. Nəcəme kə darəŋ,

¹⁴ nde ŋkəberε mə, nəloku wəka kəlo: «Wətəksε oloku: Deke dəkəlo deyī nde indedi yeri ya kəsata ka Kəcepər ka Mələkə medif kə acepse em darəŋ-ε?»

¹⁵ Endekəmentər nu dəkəlo dəpəŋ kəlo darenc, palompəs di belbel ca fəp yeyi di. Dəndo nəŋkolompse su yeri ya kəsata kəŋkə.»

¹⁶ Kə acepse ɔn darəŋ ŋəŋkə, kə ŋambere dare, kə ŋambəp ca fəp pəmə təkə enaloku ŋa ti mə. Kə ŋalompəs yeri ya kəsata kəŋkə.

¹⁷ Kə dəfəy dəmbəp, k'ender kə acepse ɔn wəco kə mērəŋ.

¹⁸ Təm nte ŋanandε dēmεsa ŋacdi yeri mə, kə Yesu oloku: «Kance icloku nu: Wəkin nu daco, nwe eyi kadi yeri kə ina mə, endeber im aterεne em dəwaca.»

¹⁹ Kəmənncne disre kə ŋayεfe kəyifət kə: «In'əfə ba?»

20 Kə Yesu oloku ɲa: «Wəkin nənə akanɛ wəco kə mɛrəɲ daco, nwe səmber waca dap din disrɛ kədi yeri mə.

21 Wan ka Wərkun endefi, pəmə təkə ancic ti mə. Mba pələc pere peyi wərkun wəkawɛ endebɛr Wan ka Wərkun aterɛnɛ ɔn dəwaca mə! Kənatəkom ka wərkun wəkawɛ kənatam kətesɛ kə!»

Mariki kəpaɲnɛ kən yeri, kəpus kə acɛpsɛ ɔn

22 Ntɛ ɲancdi yeri mə, kə Yesu ɛlɛk kəcom, k'eyif Kanu barka, k'entepi ki k'əsəɲəs ɲa pəcloku: «Nəbaɲ, dis dem dɔ.»

23 K'ɛlɛk sɔ təmbəl ta wɛn, ntɛ elip kəyif Kanu barka mə, k'əsəɲəs ɲa kə ɲamun fəp faɲan.

24 K'oloku ɲa: «Mecir mem mə, mmɛ alon teta kəcaɲəs danapa da Kanu kə kənay ka afum mə.

25 Kance icloku nu: Ifəsəmun wɛn haɲ dəsək ndɛ indegbəkɛrɛ sɔ kəmun wi, ndɛ dəbɛ da Kanu mə.»

26 Ntɛ ɲalip kələɲəs mɛlɛɲ mokor-korɛ Kanu mə, kə ɲawurnɛ ntende kəca ka tərɔ ta Tək ya Olif.

Yesu oloku a Piyɛr endecɛ kəcɛrɛ kən

27 Kə Yesu oloku ɲa: «Nənə akanɛ fəp nəndelukus im darəɲ, bawo Yecicəs Yosoku yoloku: «Indesut wəkɛk, ɲkesiya yɛsamsɛr.»

28 Mba k'indɛfɔtɛ afi daco-ɛ, indekəkar nu Kalile.»

29 Kə Piyɛr oloku kə: «Ali fəp fəlukus əm darəɲ, ina ifəlukus əm darəɲ.»

30 Kə Yesu oloku kə: «Kance iclok'əm: Pibi pampɛ yati, məndegbəkəl kəmaas a mənɛɛrɛ f'em a kicipi kəcɛcam tamɛrəɲ.»

³¹ Mba Piyer pægbækæl ti pæpəŋ: «Ali sæfi kə mənə, ifəgbækæl a incər'am.» Acəpsə a Yesu darəŋ akə fəp toloku tin tayi tə ŋancloku.

Yesu esali Ketsemane

³² Kə ŋambəp kəfo nkɛ aŋwe Ketsemane mə, k'oloku acəpsə ɔn darəŋ: «Nəndɛ nnə tɛm ntɛ ɪŋkətola Kanu mə.»

³³ K'ɛlɛk Piyer, Sak kə Isan. Kə kənɛsɛ kəpəŋ kəncop kəsumpər Yesu kə abəkək ɲɛlɛcɛ-lɛcɛ kə.

³⁴ K'oloku ɲa: «Abəkək ɲɛnaŋkanɛ kədɛnc'em pəmɔ ifi. Nəyi nnə, ta nədirɛ!»

³⁵ Ntɛ Yesu ɔmbəlɛnɛ ɲa pəpic mə, k'embɛlkər kəcəp tobu dəntɔf, k'ontola ntɛ təŋsəŋɛ, kə tentam kəyi-ɛ, tɛm tocuca tatəkə təbəlɛ kə.

³⁶ Pəcloku: «Aba, Papa, mən'ɛtam mes fəp, məbəlɛn'em təmbəl pa kətərəs pampɛ. Ti disrɛ, bafə təkə ifan mə de, mba ntɛ mənə məfan mə.»

³⁷ Kə Yesu ender pəbəp acəpsə ɔn darəŋ ɲacdirɛ. K'eyif Piyer: «Siməŋ, kədirɛ kə məndɛ ba? Məntam fɛ kətədirɛ ali dec din?

³⁸ Ta nədirɛ, nətola Kanu ntɛ təŋsəŋɛ ta nəmbɛrɛ kəwakəs disrɛ mə. Pəmbas mera yonu kəyɔ pətət, mba nəyɔ fɛ səkət kəyɔ ti.»

³⁹ Kə Yesu ɔmbəlɛ sɔ, pəgbəkərə totola Kanu tin tatəkə.

⁴⁰ Kə Yesu olukus, k'ender pəbəp acəpsə ɔn darəŋ ɲacdəŋəs, ntɛ fər yɛnaləl ɲa mə, ɲanacərə fɛ toloku ntɛ ɲaŋlukɛ kə mə.

⁴¹ Kə Yesu ɔŋgbəkərə sɔ kəder tamaas k'ɛŋgbəŋ-ɡbəŋər ɲa: «Nəndirɛ sɔ, kəŋɛsəm kə nəndɛ! Telip! Nəcəŋkəl: Tɛm təmbəp, amɛr Wan ka Wərkun aciya dəwaca.

⁴² Nəyɛfɛ, paŋkən, nwɛ eyi kəbɛr im afum dəwaca mə, ɔlətərnɛ.»

Asədar ɲasumpər Yesu

⁴³ Yesu pəsərlək-loku, kə Yudas nwɛ ɛnayi acɛpsɛ a Yesu aŋɛ wəco kə mɛrəŋ daco mə, ɛnder pəsələ kənay ka afum aŋɛ ɲanatəmpər-təmpər sakma, kə tək yosutnɛnɛ mə. Alonɲɛ apəŋ, atəkɛ sariyɛ s'aSuyif kə abeki ɲanasom ɲa.

⁴⁴ Yudas nwɛ ɛnɔbɛr Yesu atɛrɛnɛ ɔn dəwaca mə, ɛnasəŋ asədar tɛmənɛ nɛ: «Nwɛ ɲkəcup mə, nkən ɔfɔ wəkakə. Nəsumpər kə, nəkekərə, nəgbəkərə kə belbel.»

⁴⁵ Gbəncana babəkə kə Yudas ɛnder, k'ɔlətərnɛ Yesu, k'ewɛ kə: «Wətəkɛ,» k'oncup kə.

⁴⁶ Kə afum akakə ɲantəpsər Yesu waca, kə ɲasumpər kə.

⁴⁷ Wəkin acɛpsɛ ɔn darəŋ daco owurɛ dakma dən, k'ɛncɛp wəcar ka wəlɔŋnɛ wəpəŋ aləŋəs, k'ɛŋgbinti ɲi.

⁴⁸ Kə Yesu oloku ɲa: «Nəwur kədesumpər im, nətəmpər-təmpər sakma kə tək yosutnɛnɛ pəmɔ nɛ ɲyɔnɛ kalbante mə.

⁴⁹ Dəsək o dəsək incyi nu daco ictəkɛ nde kələ kəpəŋ ka Kanu, ta nənder nəsumpər im-ɛ. Mba tatəkə tenyi nɛ tɔŋsəŋɛ Yecicəs Yosoku yɛlarɛ mə.»

⁵⁰ Kə asol ɔn fəp ɲasak Yesu, kə ɲayɛkɛ.

⁵¹ Wətəmp wələma ɛnacəmɛ Yesu darəŋ, pəgbalərnɛ kəloto gbəcərəm. Kə ɲasumpər kə,

⁵² mba wəkakə ɛnasalpər ɲa, k'ɛsakərənɛ ɲa kəloto kəŋkə ɛnagbalərnɛ mə, k'ɛyɛkɛ pəwur fos.

Yesu fər ya aboc kiti apəŋ

⁵³ Kə ɲanʒekəɾɛ Yesu ndena wəlonɲɛ wəpəɲ. Abɛ a alonɲɛ fəp, abeki kə atəkse sariyɛ s'aSuyif ɲambəpsɛnɛ.

⁵⁴ Piyɛɛ ɛncəmə ɲa darəɲ, pəcməmən ti pəbəlɛ, haɲ nde kəlɔ kəpəɲ ka wəlonɲɛ wəpəɲ, nde abanʒka disrɛ. Pəndɛ kə abum, pəcsayɛ nɛnc kəsək.

⁵⁵ Alonɲɛ apəɲ k'aboc kiti aSuyif fəp ɲanctɛn sede nɛ sənəkəbaɲɛ ɲa moloku məkɔ ɲanakəɗɛɲɛ Yesu, ntɛ tɔɲsɔɲɛ padif kə mɔ, mba ɲanasətɔ fɛ.

⁵⁶ Afum alarəm ɲanchonɛ kə yem, mba yem yayəkɔ yoncsurɛnɛ fɛ.

⁵⁷ Alɔma ɲaccop kəbonɛ kə yem nyɛ:

⁵⁸ «Səne kə pəcloku: «Indeləsər kəlɔ kəpəɲ ka Kanu kanʒɛ waca wa fum wolompəs mɔ, mata maas disrɛ icəmbər kəlɔma nkɛ waca wa fum wəntədelompəs mɔ.»

⁵⁹ Ali yem yayəkɔ yenasurɛnɛ fɛ kəyɔnɛ ka sede.

⁶⁰ Kə wəlonɲɛ wəpəɲ ɛyɛfɛ afum dacɔ, k'eyif Yesu: «Məfəlukse su təlɔm o təlɔm ba? Cəke cɔ mənʒoku teta moloku ma sede mɛmɛ akanɛ ɲambonc am mɔ?»

⁶¹ Mba kə Yesu ɛncanʒ, olukse fɛ toloku ntɛ o ntɛ. Kə wəlonɲɛ wəpəɲ eyif kə sɔ: «Mən'ɔyɔnɛ Krist, Wan ka Kanu nkɛ anʒor-koru mɔ ba?»

⁶² Kə Yesu oloku: «In'ɔfɔ. Nəndenəɲk Wan ka Wərkun pəndɛ kəca kətat ka Kanu nkɛ kəntam mes fəp mɔ, pəcder nərə da debeki dən disrɛ dəkəp ka dəKəm.»

⁶³ Kə wəlonɲɛ wəpəɲ ɛwali-wali yamos yən k'eyif: «Sede sərə sɔ pəmar payif-ɛ?

⁶⁴ Nəne təkɔ ɔləməs Kanu mɔ. Cəke cɔ nəncɛm-cɛmɛ-ɛ?» Kə fəp fəloku a pəmar padif kə.

⁶⁵ Kə afum alɔma ɲayɛfɛ kəyuksər Yesu lin, ɲackump kə kəro, ɲacsut kə ɲkulma, ɲacloku: «Awa

Sayibē, mālōku su an'osut əm-ε?» Kō abum ŋamban Yesu kō ŋaferəs kō waca dakanca.

Piyer ence kəcərə Yesu

⁶⁶ Təm nte Piyer enayi tantōf nde san̄ka disre mō, kō wəcar wəyecəra wəkin wəka wəlon̄ne wəpōŋ ender.

⁶⁷ Nte enəŋk Piyer pəcsayə mō, k'əŋgbətne kō, k'oloku kō: «Məna sō Yesu wəka Nasaret nənayi.»

⁶⁸ Kō Piyer en̄gbəkəl ti pəcloku: «Incərə fē, incərə fē nte məna məfan̄ kəlōku mō!» K'owur kəkōndē san̄ka tadarəŋ, nde dəkəbərə. Kō kicipi kəncam.[†]

⁶⁹ Kō wəcar wəran nwe enəŋk kō, k'əŋgbəkərə sō ti kəlōku akō ŋanayi di mō: «Wəlōma ɔfō wəkawē sō.»

⁷⁰ Mba kō Piyer en̄gbəkəl sō. Pəwon fē, an̄e ŋanayi di mō, ŋaloku sō Piyer: «Səlan̄ ti, afum akan̄e wəkin məyōnē, bawo məna sō wəka Kalile məyōnē.»

⁷¹ Kō Piyer eyefe kəderəm: «Kanu kətərəs im kō pəyōnē a kəyemē k'indē-ε! Indərəm a incərə fē fum wəkawē nən̄le mō!»

⁷² Gbəncana babōkō kō kicipi kəncam sō tamərən̄. Kō Piyer encəm-cəmne toloku təkō Yesu enaloku kō mō: «Məndegbəkəl kəmaas a mən̄cərə f'em a kicipi kəcəm tamərən̄.» Kō Piyer eyefe kəbok.

15

Yesu fər ya Pilat kirin̄

¹ Nte bətbət bəmbəp mō, alon̄ne apōŋ kō abeki, atəkse sariyē kō aboc kiti aSuyif fəp, ŋalon̄kanē kəkōtəŋne nte andeyō Yesu mō. Nte ŋalip kəkot kō mō, kō ŋamber kō Pilat dəwaca.

[†] **14:68** Yəgbəkərə ya yecicəs yokur yəlōma yōyō fē: «Kō kicipi kəncam.»

² Kə Pilat eyif kə: «Mən'əyənə wəbə ka aSuyif ba?»
Kə Yesu olukse kə: «Mən'oloku ti.»

³ Alonə apən njanatəmpərə kə meyemsənə mələrəm.

⁴ Kə Pilat eyif kə sə: «Məfəloku ntə o ntə? Məne mame nambonc am mə fəp!»

⁵ Mba Yesu enalukse fə kə sə toloku ntə o ntə, ti tənawosəs Pilat kusu pəpən.

Ankiti Yesu kəfi

⁶ Awa kəren o kəren kəsata ka Kəcepər ka Mələkə Medif, Pilat encsake afum yənən wəyi dəbili wəkin nwe njanfan mə.

⁷ Təm tatəkə fum wələma enayi dəbili pacwe kə Barabas nwe anabər dəbili teta kədif fum, ntə njanayefə kəyənəkər abə a dətəf səbomp mə.

⁸ Kə kənay ka afum kəmpə, kə njanayefə kəyifət a payənə njanə təkə ambət kəyənə njanə mə.

⁹ Kə Pilat eyif njan: «Isakərə nu wəbə wəka aSuyif ba?»

¹⁰ Bawo Pilat enacərə a kəraca ka alonə apən kənasənə njanə kələk Yesu njanə kə dəwaca.

¹¹ Mba kə alonə apən njanə njanə kənay ka afum, ntə tənənə pasake njanə yənən Barabas mə.

¹² Kə Pilat njanə kərə sə: «Cəke cə nəfan a iyə nwe njanə wəbə ka aSuyif mə-ə?»

¹³ Kə njanəfə kəkule-kule: «Məcan kə dətək yepəmpəl!»

¹⁴ Kə Pilat eyif njan: «Pələc pere p'əyə-ə?» Mba kə afum njanə kəkule-kule pəpən: «Məcan kə dətək yepəmpəl!»

¹⁵ Kə Pilat encəm-cəmne kəyə tefan ta kənay ka afum: K'esake njanə yənən Barabas. Ntə elip kəsom

pasute Yesu tərənkan mə, k'ember kə afum dəwaca a pacan kə dətək yepəmpəl.

Asədar ɲafani Yesu

¹⁶ Kə asədar ɲankekəre Yesu nde aban̄ka ɲa kələ kəpən̄ ka Pilat, kə ɲawe dən̄gben̄k dadəkə fəp.

¹⁷ K'asədar ɲamber Yesu duma d'abə deyim, kə ɲanden̄ər kə dərɔmp an̄gbən̄kələ ɲa ben̄k yodu.

¹⁸ Kə ɲayefe kəfani kə ɲacyif: «İɲyif əm, wəbe ka aSuyif.»

¹⁹ Kə ɲasute Yesu domp kəgbo, kə ɲayukər kə lin, ɲanut suwu teta kəfani kə.

²⁰ Nte ɲalip kəfani kə mə, kə ɲawure kə duma d'abə deyim kə ɲamber kə yamos yən. Kə ɲankekəre kə kəkəcan̄ kə dətək yepəmpəl.

Ancan̄ Yesu dətək yepəmpəl

²¹ Kə asədar ɲawe fum wələma nwe ɛnayefe dale mə, pacwe wəkayi Simən̄ wəka dare da Sirən, papa ka Aleksandar kə Rifis, kəkəgban̄ne tək yepəmpəl nyə anakə kəcan̄ Yesu mə.

²² Kə ɲankekəre Yesu kəfo nke an̄we Kolkota mə, itə tatəkə «Kəfo ka Kəmbəmbələ».

²³ Kə asədar ɲafan̄ kəsən̄ Yesu wen̄ wənən̄kəl acəl n̄ɲe an̄we «*mir*» mə, mba Yesu ɛnawose fe wi kəmun.

²⁴ Kə asədar ɲancan̄ Yesu dətək yepəmpəl, kə ɲayerəne yamos yən, ɲakote ti yampun̄pun̄ nyə nwe o nwe en̄kekəre nde ndərən̄ mə.

²⁵ Walaha wen̄ayi nte ɲanccan̄ Yesu dətək yepəmpəl mə.

²⁶ Tecicəs nte tə ɲanacic kəmentər ka tes nte tənəsən̄e k'andif kə mə: «Wəbe ka aSuyif.»

27 Kə ɲancan Yesu dətək yepəmpəl kə calbante mərən, wəkin pəyi kə kəca kətat, wəkə pəyi kə kəca kəmeriya.

28 [*]

29 Acepər ɲacləməs Mariki Yesu, ɲacfek kə domp. ɲacloku: «Məna nwε məncekəli kələ kəpən ka Kanu, məcəmbər sə ki mata maas disre mə,

30 məyacne mənasərka, mətor dətək yepəmpəl yayε!»

31 Aloɲne apən kə atəkse sariye s'aSuyif, ɲa sə ɲancfani Yesu ɲacloku: «Enayac aləma, mba əfətam kəyacne nkənsərka!

32 Krist, wəbe ka Yisrayel pətor ən ma dətək yepəmpəl, nte tənşənə sənənək səlan sə ti mə!» Afum akə anacan kə Yesu mə, ɲancləməs kə sə.

Defi da Yesu

33 Pəndeyi dan, dec dosurene afum dəsəbomp, kə kubump kəntor dəntəf fəp, tənabəle kətənc han salifana.

34 Salifana səndebəp, kə Yesu ən kule-kule: «*Eloyi, Eloyi, lema sabaktani?*» Itə tatəkə: «Kanu kem, Kanu kem, ta ake tə məsak'em-ε?»

35 Afum aləma akə ɲanayi di mə ɲanane kə dim. ɲancloku kəfəto disre: «Məcənəkəl, Aɲnabi Eli eyi kəwe tatəkə.»

36 Kə fum wələma eyekse, k'ənəkə pəpuk yangba dəməncəncə, k'ənepsər yi dəkəmotə, k'əsən Yesu a pəmun, pəcloku: «Nəkar ma, pəməmən belbel kə təyənə a Eli endeder kədetore kə-ε.»

* 15:28 Yecicəs yokur yəcəkə-cəkə yələma yəyə fε moloku mame: «Tətəkə tə tecicəs tənamentərne, nte tənəloku: «K'ancəmbər kə calbante daco.» (Məməmən sə Luk 22.37 kə Esayi 53.12.) 15:34 Yabura 22.1

³⁷ Mba kə Yesu owurɛ dim dəpən, k'ɛngbin kifir.

³⁸ Kə kəloto kələl nkɛ kəŋkəŋk təkso ta kələ kəpən ka Kanu mə kəŋgbɛɛ daco, kəyɛfɛ takəron han tantɔf.

³⁹ Ntɛ anəŋk Yesu kəgbin kən kifir mə, kə wəbɛ k'asədar wəRom nwɛ ɛnayi di pətɛfərnɛ kə mə, oloku: «Fum wəkawɛ, Wan ka Kanu yati ɛnayi.»

⁴⁰ Aran sɔ ŋanacəmə pəbɔlɛ ŋacməmən. Aran akanɛ daco: Mari wəka Makdala, Mari iya wəka Sak wəfɛt kə Yoses, kə wəran wəloma nwɛ ancwɛ Salome mə.

⁴¹ Aran akakə ŋanacəmə Yesu darən, ŋacbəcɛ kə ntɛ ɛnayi Kalile mə, kə aran alarəm aloma anɛ ŋanapɛ kə nkən Yesu Yerusalem mə.

Ambɛr Yesu dəkufu

⁴² Dɔfɔy dəmbəp, mba ntɛ pənayənɛ dəsək da kəlompəsnɛnɛ simiti dəsək da kəŋesəm mə,

⁴³ wəka Arimate wəloma nwɛ ancwɛ Isifu mə ɛmbəkɛ, k'əŋkə ndena Pilat kəkətola kə kəbɛl ka Yesu ntɛ tənɔŋɛ pəwup ki mə. Isifu, fum wəpən ɛnayi aboc kiti aSuyif daco, nwɛ kəder ka dəbɛ da Kanu kənabas mə.

⁴⁴ Kə pənciyanɛ Pilat kəne a Yesu elip kəfi katəna. Kə Pilat ewɛ wəbɛ wəsədar k'eyif kə, kə tɔyənɛ a Yesu efina pəwon-ɛ?

⁴⁵ Ntɛ wəbɛ wəsədar oloku kə təkə tənayi mə, kə Pilat owosɛ Isifu kələk kəbɛl ka Yesu.

⁴⁶ Kə Isifu ɛway arəfən ŋa kəloto kətelər, k'ontorɛ Yesu dətək yɛpəmpəl, k'ɛnɛpsər kə ŋi, k'omboc kə dəkufu nkɛ anayək dətasar mə. Ntɛ elip mə, k'embɛŋkəli tasar mɛɛ ɛnasuncɛ dəkəbɛɛ da kufu kəŋkə mə.

⁴⁷ Mari wāka Makdala kō Mari, iya ka Yoses, ŋacgbekāre nde kāfo nke anaber kō mō.

16

Yesu kāfōte kōn afi daco

¹ Nte simiti dōsōk da kēŋesām dencepār mō, dōckōsōk sandeŋ, kō Mari wāka dare da Makdala, Mari iya ka Sak, kō wāran wālōma Salome ŋaway moro mobotu ambōnc, kādesop mi kābel ka Yesu.

² Tataka ta sandeŋ bātbāt suy, kō ŋander nde dākufu.

³ Ŋacyiftene tanan: «An'ōŋkōbīŋkālē su tasar tōkō asuncē dākāberē da kufu mō-ε?»

⁴ Ŋandeyekti fōr, kō ŋanāŋk tasar pōpōŋ papōkō pabīŋkālī pi.

⁵ Nte ŋancberē dākufu mō, kō ŋanāŋk wātēmp wālōma pānde kōca kātāt, pāberne duma dobolu defer, kō ŋanesē.

⁶ Kō wātēmp nwē oloku ŋa: «Ta nānesē. Yesu wāka Nasaret nāntēn, wākō anacāŋ dētōk yēpāmpāl mō. Ōfōte afi daco, eyi fē nnō! Nānāŋk kāfo nke k'anaboc kō.

⁷ Mba nākō nāloku acēpse ōn darāŋ kō Piyer a Yesu eyi nu kirīŋ kākō Kalile: Difō nāŋkōnāŋk kō, pāmō tōkō ēnaloku nu ti mō.»

⁸ Kō aran aŋe ŋawur dāndo dākufu kō ŋayekse, ŋacyikcē, cusu cāwos ŋa. Ali tes ŋanaloku fē fum, bawo ŋananese.

Yesu ementārne Mari wāka Makdala

⁹ [Nte Yesu ōfōte defi mō, bātbāt ba tataka tōcōkō-cōkō ta tataka toluksār, k'owurār kārēsna Mari wāka Makdala, wākō Yesu ēnabelās yōŋk yelēc camāt-mērāŋ mō.

¹⁰ Kə Mari wəka Makdala əŋkə pəloku moloku maməkə akə ŋanakə kə nkən, ŋayi kəbal ka defi da Yesu, ŋacbok mə.

¹¹ Ntə afum akanə ŋanane a eyi wəyəŋ, a nkən Mari wəka Makdala enanəŋk kə mə, ŋanalan fə ti.

Yesu ementərne acepsə ən darəŋ

¹² Ntə tatəkə tencepər mə, kə Yesu ementərne sə teyi təloma acepsə ən darəŋ mērəŋ aŋe ŋanckə dəkulum mə.

¹³ Kə akakə mērəŋ ŋander sə ŋaloku ti acepsə a Yesu darəŋ alpəs akə. Ŋa sə, ŋanalan fə ŋa.

Yesu ementərne acepsə ən darəŋ aŋe wəco kə pin

¹⁴ Təlpəs ŋə, kə Yesu ementərne acepsə ən darəŋ aŋe wəco kə pin, tem ntə ŋacdi yeri mə, k'ənal ŋa kəbut kəŋan kəlan kə kəyəŋk domp kəŋan, bawo ŋanalan fə akə ŋananəŋk kə ntə enafətə afi daco mə.

¹⁵ Kə Yesu oloku ŋa: «Nəkə doru dandə fəp, nəkə nəcam Kibaru Kətət nnə afum a doru fəp ŋayi mə.

¹⁶ Məna nwə məŋyənə wəlan, məsətə kəgbət dərömun teta Kanu mə, aŋyac əm, mba məna nwə məntəlan mə, antərəs əm dəsək da kəkiti.

¹⁷ Nənəŋk məgbəkərə mmə mendesolə aŋe ŋandeyənə alan mə: Tewe tem tendesəŋe ŋacbeləs yəŋk yələc. Ŋande ŋaccəp cusu nce ŋanatəcərə mə.

¹⁸ Ŋande ŋacsumpərə bok waca. Pomun pəkəntəŋ mpə o mpə pə ŋamun pəfəyo ŋa təlöm o təlöm. Ŋande ŋacden acuy waca, akakə ŋactamne.»

Yesu olukus Kanu kəsək

19 Mariki Yesu, ntɛ elip kəlɔk-lɔkər ɲa mə, k'ampɛnɛ kɔ dɛKɔm, k'ɔŋkɔ pəndɛ Kanu kəsək.]*

20 Kɔ aɛpsɛ a Yesu darəŋ ɲaŋkɔ mofo fəp kəkəsamsər Kibaru Kətət. Mariki ɛncbəc kɔ ɲa, pəcsɔŋɛ dəmɛgɓɛkərə mɛ ɲancwure, paɕlan moloku maməkɔ.†

* **16:19** Yecicəs yecəpər yokur mɛrəŋ, kɔ yolɔma nyɛ alan mə, yəyɔ fɛ moloku mɛlpəs ma kibaru kaŋkɛ kəyɛfɛ sora 9 haŋ 19. Moloku mamɛ dəyecicəs yofu yelpəs meyi. † **16:20** Moloku mɛmɛ meyi fɛ Yecicəs Yosoku yokur fəp: «Mba pəpic pɔ ɲancloku asol a Piyər ntɛ anasom ɲa kəlɔku mə. Ntɛ tencepər mə, Yesu nkənsərka osom ɲa kəkəkərə kawandi kəpus nkɛ kəntəlɪp mə kəyɛfɛ ndɛ dec dəmpɛ kəkɔ ka ndɛ dɛŋkalɛ mə, kəyɔɕ ka doru o doru nkɛ kəntəlɪp mə. Amina»

Kitabu ka Kanu
Portions of the Holy Bible in the Baga Sitemu language
of Guinea
Des portions de la Sainte Bible dans la langue Baga
Sitemu de Guinée

copyright © 2015 Pioneer Bible Translators

Language: Baga Sitemu

Translation by: Traducteurs Pionniers de la Bible

Contributor: Pioneer Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-29

PDF generated using Haiola and XeLaTeX on 29 Apr 2025 from source files dated 29 Apr 2025

e5320012-5c6f-534d-9205-97d787f9a95c